



勉菴集

十七

~16  
2374  
17

共二十三



2374  
23-17

勉菴先生文集卷之三十三目錄

墓表

重菴先生全公墓表

司憲府持平遜齋鄭公墓表

湖隱羅公墓表

贈司憲府監察全公墓表

贈童蒙致官鄭公墓表

習靜齋河公墓表

安州管將鄭公墓表

鶴溪慎公墓表



學生趙公墓表

副護軍徐公墓表

副護軍黃公墓表

晚歎齋李公墓表

溪隱崔公墓表

感慕齋金公墓表

樵隱廉公墓表

芝隱崔君墓表

贈童蒙教官金君墓表

贈戶曹佐郎李公墓表

學生梁公墓表

感慕齋鄭公墓表

通德郎慎公墓表

嘉谷尹公墓表

贈參議崔公墓表

櫟叟安公墓表

晚覺梁公墓表

二未齋金公墓表

逝川申公墓表

進義副尉吳公墓表

燕峰安公墓表

自守翁李公墓表

竹峰高公墓表

鳴鶴亭鄭公墓表

愚軒尹公墓表

學生朴公墓表

隨洞文公墓表

勉菴先生文集卷之三十三目錄



勉菴先生文集卷之三十三

墓表

重菴先生金公墓表

蓋自聖澤寢遠邪誕妖妄之說愈出愈橫而洋夷之禍最烈於天下時則有若我華西李先生起自草萊倡言排之以當剝九碩果之象繼華翁而終其事者惟重菴金公先生諱平默是已先生遠述朱宋之緒近遵師門之旨平生苦心惟在乎扶正道斥邪說尊中華攘夷狄斯數義而已蓋其義也具著乎春秋綱目及宋子大全華西雅言之編而先生遇時益艱其

所以擔夯而張皇之者尤不遺餘力雖天定久不惟不能使其道粗行而甚加之以窮餓竄謫之厄然終不能奪先生之志以少降其氣天亦於先生固不奈何矣若夫以一身而扶聖道於已墜以一言而闢洋瀾於方萌屹然如擎天之柱支厦之木而上以為先王崇儒重學之報下以為百世及經復陽之基者則天之所以成就先生者蓋亦不小其不可以一時之屈伸為先生戚戚也明矣先生初亦隨時為功令之業年二十四始謁華西先生繼及梅山洪先生之門因遍交當世有識之士其學問全體純一無疵者莫

如華翁遂委心而服事大而太極心性之奧小而日用事物之煩莫不精以究之密而察之不守偏見不安小成心有所未契則雖師教之勤而不敢苟同理有所獨得則雖衆誅之加而不少撓改至其晚年所見並高所行益熟則坦然自信毅然自固髡髮莫能難責育莫能奪先生之於道可謂獨見其大意矣是以論學問則直訖諸程朱而所適於諸氏及東賢以為心者理氣之合也心之氣則所謂虛靈也心之理則其所以虛靈者也性情之統領主腦也又曰心者萬理之總會於我者也一本也大綱也達德也敦化

也天下莫能載者也理者心之分儀於物者也萬殊也細目也達道也川流也天下莫能破者也合而言之則明德之全體大用也若夫形而下者則取乘之機也君子有弗心者焉時鼓山任公憲晦肅齋趙公秉憲與先生於梅山為同門而二公皆主梅山之言以為明德本心也本心是氣之本而包理在其中先生主華西之言以為心有以氣言者有以理言者如明德本心之類以理言非以氣言者也自此明德本心在氣主理之論為學者大題目戊子省齋柳公作書數萬言其明德主理則不變師說而論心則以為

心雖有以理言處然辨位正名則心是形而下之一物先師說心多從形上上立說而分物則無端的可指處今若憚於更張而不思所以調補則一傳再傳恐起後弊先生曰心雖氣也物也心之所以為心非形而上之道理乎孔子曰觚不觚觚哉觚哉愚亦曰心不心心哉心哉故不觚之觚非觚也不善之心非心也此心名目是氣先師豈有不知特舉世所共知所共說故無事於言而罕言耳因舉雅言心氣也物也等諸條以辨之柳公承其指因取先師心兼理氣說五條為先師心說正案以質于先生先生遂可之

然柳公猶主調補之論而又於臨終竟收其正察蓋先生初嘗與師說不合後乃犁然而無疑柳公則始信而終違先生蓋嘗心痛焉論事藁則以紹述 孝廟尤翁志事為後王後民之責一日不講此義三綱淪九法斁而人不得為人矣是以雖尋常文字皆用崇禎尤致意於加平之 皇壇每歲祭享不躬叅則必送其門人甲申三月即 毅皇殉社之五周甲也時先生在謫猶北向拜哭作詩以寓風泉之意至於洋夷之橫行天下則又捨北虜而費力斥之以為北虜夷狄也猶可說也洋夷禽獸也不可言也其斥之

之方則未嘗不以不通商為切要是以凡日用什物凡屬洋物者一毫不入家至門人之來問學者亦皆以是為戒辛巳弘集使日本還持黃遵憲私議冊子而來其書感稱邪學之利八道儒生封章請討者萬餘人而關東疏首洪在鶴即先生門人也最以直言受劇禍時輩並憎先生欲加禍而無所執先是先生抵書嶺南疏首以示勸獎之意大司諫李源逸遂執以為辭構劾甚慘先生竟竄于智島甲申變服先生大慟以為君有亂命據理不從者所以救君之過也若以服舊服得罪當含笑就死也先生嘗承師命與

免菴集  
柳公共修華東史合編綱目兼著發明以附之又與  
柳公就先師全集採其節要為雅言三十六篇學者  
寶之又著程書分類集疑近思錄附註隆師錄宋子  
事實記闢邪書治道私議等諸書嗚呼先生始阨於  
貧東西流離奉偏慈四十餘年志養無違不以傷教  
易其操力學耐苦七十年如一日又以主理斥洋外  
與時輩為仇內與士類不合至有異端之斥者而其  
甚者則又憑藉講說陰合時輩以欲加不測之禍者  
屢矣而先生所以為先生則固自如矣後千百世倘  
天道有明公議有伸論先生之世觀先生之道則其

不以為坤復文會間少不得底命世君子者幾希矣  
至於學問主理宗旨則必待後紫陽而質之非可與  
窺儒俗士議也門人柳麟錫等方釐其文集為數十  
卷活印行于世云先生字穉章金氏籍清風以 中  
廟名賢大司成諱湜為遠祖諱錫裕諱道泓諱聖養  
其曾若祖禰也妣長水黃氏瑾女以 純廟己卯九  
月六日戌時生於抱川治南時雨村舍先是黃夫人  
有夢龍虎之異卒以今 上辛卯十二月二十日壽  
七十三葬在永平治東御師洞良坐之原先生曾以  
繡薦拜繕工監假監役題墓曰重菴處士者遵遺命



也配水原崔氏考景詰生一男二女男基朋早歿女  
適申達秀洪在龜基朋繼子春善申無育洪子鍾亨  
曾孫益曾益昌益 女適尹 崔勉植勉植即益  
鉉過房子承學子也玄孫男女幼春善以益鉉撰與  
先生同門託為表墓之文遂撮其大槩俾書于石

司憲府持平遯齋鄭公墓表

尚論古人以殘缺文獻難矣哉槩於其世道升降師  
友淵源而參之以出處大略則庶或寡過故遯齋鄭  
公諱汝諧字仲和其先河東人父縣監之英大父參  
奉由周曾大父 贈戶判仁貴高祖中顯大夫典客

令賢佑高麗平章畢道正為鼻祖母淑人新平宋氏  
承旨鍼女生以 莊憲王三十二年庚午幼性慈良  
視物如傷長益通明奉親接人依如老成年才十二  
三知舉業外有古人為己之學族兄一蠹先生見而  
重之為言蒙以養正大易垂象玉不琢不成器禮經  
有訓頌親近師友開發見識母徒作緇里凡人為也  
公遂慨然發奮贊見佔畢齋全先生講中庸疑義先  
生大加稱賞因與同門人若金寒暄南秋江金濯纓  
諸先生麗澤相資孜孜不已則其造詣精深踐履篤  
實蓋可信矣 宣陵庚子登司馬尋以學明經術探

索義理被成均首薦甲辰除朔州教授丁未超陞為  
司憲府持平乃謂虛名縻爵吾實恥之懇辭不就其  
重內輕外得溪而見誘少者不可誣矣戊午事作畢  
齋禱及泉壤寒暄付處熙川一蠹安置鍾城餘外諸  
賢並皆竄逐而善類幾乎盡矣時公養疾家居不勝  
憤慨草疏數百言將叫 闕伸救聞寒暄移配昇平  
袖其藁徃省寒暄謂意固善矣奈禍不旋踵何即奪  
而付丙曰風雲際會亦關時運白日照臨從容就命  
豈非平日講磨之本意耶公遂痛哭而歸杜門却掃  
不接外事因扁其所居曰遜齋蓋取朱先生遇遜焚

藁之義也是則公於數先生者雖隱顯微著之不同  
其生同志死同傳而可徵來世又豈不綽有餘地乎  
享年八十一而卒於庚寅三月葬在綾州耳谷子坐  
之原淑人竹山安氏禮曹正郎璟女至二男四女男  
長億齡蔭青山訓導次箕齡進士孝行 健元陵祭  
奉女適叅奉文獻縣監崔沃進士李薰忠生員高需  
後孫在洪在禹遠走數百里請豎表之文不能以老  
耄辭銘曰

甘陵構禍有道括囊餘干去國晦翁焚章存沒雖殊  
一致其揆猗公終始允矣吉士

湖隱羅公墓表

見木知山况父祖典型可不於子孫而徵信乎羅君性淳世居錦城曲江之上從余遊者有年見其服先王之服讀古人之書依然有法拂樣子日袖其王考湖隱公遺事言於余曰我姓本自中國豫章而來歷麗迄我簪纓也忠義也孝行也世趾厥美至我王考則嵯巖七十年無顯顯之名有謙謙之德所以自為而為人者不越乎晦翁小學石潭要訣問寢視膳養極志物哭泣饘粥喪盡禮制念兄弟分門易致踈泛則每舉張公藝九世同居栗谷兄弟爭親圖以申之

持身謹嚴平生迹不近城府口不設雌黃調度豐約不經於心或勸之力穡則曰人生飲啄各有定分薄田數畝足可奉祭過此以往吾所不知門徒有以物遺亦辭不受曰東脩雖古禮而余無堪為人師每月課五日會諸生設講講訖必辭釋四勿箴以提誘之丙寅洋氛人情洶懼為膽仁陵朝闕邪綸音布示遠近使知向背凡茲數事初非有所為而為之乃天質之自然而亦宗族鄉黨耳目之所睹記也夫人於祖先無其事而駕空傳會固誣也有其實而泯然無傳亦罪也願借重一言資飾泉途謹按公諱在晉字

晉汝籍羅州父曰慶純大父曰尚身有孝行曾大父  
曰璜摠管高祖曰學海叅判高麗上將軍富其上祖  
純祖乙丑今 上乙亥其生卒龍虎洞中燈丙麓其  
藏齊濟州梁氏通德即達浩女二男錫權錫圓一女  
適尹範龍錫權娶天安全光直女一子即性洙再娶  
金海金桂麟女四子某某錫圓娶固城李均女一子  
俊洙噫當此之時使州郡每得如公輩人警勵頽俗  
則西洋荐食之禍亦可以少熄矣遂歎息而叙次如  
右

贈司憲府監察金公墓表

金君永圭袖家狀論於不佞曰吾先子猷猷數十年  
無赫赫名有孜孜心用天因地制節謹度而家室潤  
怡愉甘脆志物兼備而二親安建塾峙糧擇師教子  
而宗黨鄰里咸蒙其澤上自衿紳下洎樵牧一辭稱  
善人而葬十餘年墓無石懼其與匹庶塚無別茲具  
三尺碣願丈人垂以一言余欽衽對曰古人云先祖  
有美而不知是不明也知而不傳是不仁也子其免  
矣夫按公諱鉉瑞字汝行金氏系出新羅敬順王傳  
至高麗太子少保貞烈公存中封龍宮君子孫因籍  
焉三傳有宜寧縣監堅壽因宅厥土再傳至副尉長

孫移奠于山陰之長溪是生寶號述古齋薦授厚  
陵叅奉輿德溪吳先生爲道義交是生繼宗官部將  
壬辰倡義於公爲十世若九世曰尚集曰澤曰有興  
曰宅春壽資僉樞是其四世妣淑夫人慶州李氏考  
奇億公生卒俱丙戌配咸陽吳氏永鎮女子即永圭  
靖陵叅奉孫男沂植閔泳祿權願煥孫女婿其 贈  
司憲府監察以孝行褒典也

贈童蒙教官鄭公墓表

公諱重獻字文述鄭氏籍河東考熙運號東峰祖世  
頑曾祖光淵文獻公一蠹先生其八世祖 英宗戊

申亮賊犯順中外響應時則東峰公以布衣首先奮  
義厥樹磊落朝廷錄其功連除 慶基殿 厚陵叅  
奉不就娶晉陽姜氏以遇女育丈夫子六人公其長  
也公早襲庭訓又師寒泉李文正先生尊聞行知律  
身以禮臨事致謹無毫髮苟且依違態父倡義時從  
軍贊籌畫性根孝友事繼母無間所生父病且革禱  
辰請代及喪幾絕仆地杖而後起與諸弟友愛篤至  
人無間言居家勤儉每晨謁家廟朔望展省親墓不  
避風雨常言事亡之道惟有祭祀於此不用其誠惡  
乎用其誠值先忌必三日齋素哭盡哀不以老癯或

衰教子姪必以義方接引後進教導諄諄或有質疑者必竭兩端使之開悟焉朝廷薦其賢再擬寢即而竟不調時論惜之享年八十四而以 健陵辛丑卒於寢及葬遠近士大夫多以詩送之其曰名登薦剡慳天點學究遺經老革門者實錄也今 上乙酉贈童蒙教官以孝也庚寅又旌閭以倡義也夫人柳氏籍文化考光慶有婦德先公歿一男鎮成二女盧廷稷李恒烈鎮成一男德濬德濬二男東五東玉曾玄不盡錄後孫在櫓好古謹慎以狀來請銘銘曰大賢脚下有異於人聲行焯焯福履斯臻後承繁衍

有文有行惟其有之慶流宜永

習靜齋河公墓表

陰陽不可相無而終有淑慝之分故大易以君子小人斷之聖人豈無所以而乃爾也哉余讀習靜齋河公遺事其於所以處辛壬義理知其為嶺右之毅然守正人也蓋父死子繼兄亡弟及天地之常經嶺以南煽動危言自陷於無將之誅春秋一部無地可講而公眇然一儒坐耳乃與鄭東野相虎折其左辛壬者曰陶菴李公有言嶺南自毀斥栗牛之後人才不生今日無君之論乃誣賢之輩有以致之也噫嶺右

魁  
至今能知忠逆之分惟二公是賴當世龍虎之稱宜  
我公初諱應龍後改應運字汝登習靜齋其號也姓  
河氏系出晉陽始祖高麗門下侍郎贈平章畢拱辰  
嘗奉使契丹死之麗史有傳自是代有偉人簪紳相  
承入我朝有晉康君湜中世有進士愷鄭寒岡門  
人享臨川院於公為高祖再傳至生員洛受學于尤  
春兩先生兩先生溪加竒愛常目之以仙鶴考諱潤  
字妣海平尹氏吏曹叅判世揆女文翼公昉之玄孫  
生公於治北丹池洞里第公娶玉山張氏郡守字極  
女二男載岳必東崇浩女尹邦翼側出孫男鎮兌以

孝 贈教官旋其間長房出鎮珥鎮宅次房出曾孫  
益範號士農窩性澹宋先生門人餘不盡錄公事父  
母極其孝於兄弟友愛篤至髻齒讀擊蒙要訣署曰  
此乃做人要法甫成童文藝已成三捷鄉解目見士  
習奔競於是遂不復應舉藏書數千卷閉戶潛玩不  
以事物經心嘗曰靜字工夫自周先生發之而程門  
教人不作筭二義蓋唯靜養然後動可以有為號以  
習靜蓋有所本云送第二子受學于陶菴手書朱子  
與長子受之書遺之曰常思我所以送汝者何意汝  
所以來此者何事勉焉孳孳毋敢怠毋欲速必盡心

也公素有山水趣與鄭明菴杖屨无菴壑動輒相隨  
飄然有遺世之意然嘗見守宰量田應文逃責而歎  
曰今不先正經界徒以繩尺定稅稅安能均乎生  
肅廟丙辰卒 英廟丙辰得年六十一臨歿神想了  
然手書戒子無一言及他事墓于沙竹里五毛加谷  
卯坐之原東野祭公文有曰君於人少許可以是人  
或不悅於是非尤分明不為人所撓奪挽詩又曰麟  
經大義相扶日蓋皆有指也公於易深得其妙撰著  
以斷吉凶無不脗合至於經世啓蒙等書亦皆覈其  
源委晚欲著為一書而未果惜哉然以陰陽向背觀

之公真學易者哉述其遺事者六代孫啓龍而請余  
表其墓者七世孫廷植宗植也

安州管將鄭公墓表

公諱善毅字養吾自號閑翁海州人始祖肅高麗侍  
中入本朝典文衡易謚貞度四傳至希儉號漁隱  
進士與伯兄虛菴希良知甲子禍起隱約不仕靖北  
勲臣農圃忠毅公文孚其六世祖也曰構曰相點曰  
璽曾祖以下三世皆有文行妣晉州河氏某女生公  
於晉州之龍巖村笄自少志氣豪邁折節讀書以儒  
雅稱以榮親計出脚韎韋為武兼宣傳官壬申賊希



著陷嘉山公請挺身出征朝廷不許然壯其氣義庚辰出為安州營將登太白山北望痛哭曰我大明之讐未報而至今共戴一天耶血淚迸落觀者感歎平生志節此可見矣年五十七而以純祖癸未卒臨命執其弟鑽穀之手曰吾棄革之志未遂是至恨也公持身儉約不汲汲於進取養親以誠居喪以禮與弟友愛甚篤長枕大被怡怡如也每教子姪曰師何遠求師在黃卷中夙夜勤讀無違迺父志也鄉黨至今稱武名儒行配安東權氏水使必稱之孫女生一男一女男鳳賢濼原縣監女適權忠夏生員後配

綾州具氏淫女生三男宅賢麟賢麒賢司果孫曾不盡錄公之曾孫準教龍教抱公之狀謁其墓文其族入前府使圭錫為之介不敢以老昏辭

鶴溪慎公墓表

慎氏安陰巨族文行也仕宦也世趾厥美蔚有望實近故鶴溪處士必瓊字景寶亦其一也慎氏籍居昌上祖麗朝左僕射修謚恭獻歷至本朝右贊成以秉謚襄烈傳至樂水齋權以學行聞士林俎豆曰梯曰守沉曰復明高曾祖三世考性烈監察妣淑人晉陽姜氏同中樞憲女並以孝烈旋間公生以正廟

甲寅稟姿秀凡自幼年孝謹承歡不啻親志九歲遭  
父喪哀毀幾殊十六值內艱亦如之及省事以不得  
終養爲至恨每值喪餘必齋潔致哀朔望省掃不以  
雨雪少弛勸弟遊學師事剛齋宋先生尊聞行知所  
造益深薄於自奉而憇於惠人歲適大侵附近民人  
多就先塋內剝取松皮公盡然傷心大斥土買穀散  
給飢戶人皆感服不敢復近平生是不入城府口不  
道雌黃訓子侄以循蹈矩繩至在敦宗族厚隣里接  
人忠而及物恕者皆言足聽聞古所謂善信人者非  
耶享年六十而以 哲宗癸丑卒于寢夫人昇山李

氏進士奎漢女四男一女男長在翼次在奭在獻鶴  
九在獻出系公季弟必璜女適安東權鎰煥炳寧炳  
晉炳魯炳漢在翼出炳七在奭出炳道炳渾炳世在  
獻出炳櫟炳薰鶴九出曾玄不盡錄請文者炳淳子  
宗軾

學生趙公墓表

余於頭流之役得見趙君舜九於橫川席上接其容  
貌聞其語言知其為休休好善之人君亦不余鄙夷  
相與周旋於伽倻雙礮之間甚相歡也既而言於余  
曰我高王考塋在昆陽加利面吉浦山亥坐之原今

將立石紀實以詔來裔而家無文獻之傳有得於鄉鄰父老誦傳者曰敦孝友睦宗族愛賓友廣施予質實勤儉人又訓子弟嘗云生長遐陬登科入仕雖未易致績文學開心目不可不勉只當以忠信不欺為行已接人之本此乃以口傳口之寂寥冷談將若之何余曰無傷也古人尚質寧行有枝葉不欲其言有枝葉故雖以聖門諸子之賢不著經史者十居八九况其下焉乎在後承繼述之地只當求諸已而不求諸人重其內而不務其外績學修身不愧為乃公子孫不亦善乎既以語舜九記其問答如右俾歸而刻

諸石公諱斯毅字正兄父命龜大父鳳翼曾大父旻熙高祖汝寬麗季德谷先生承肅其顯祖也妣晉陽姜氏世漢女生 英廟戊寅卒 純祖辛卯配金海金氏考夏三晉陽姜氏考師尹一男安億早卒四女婿鄭守一姜棕八鄭八佑鄭益翰孫性魯生員曾孫長膺奎判官次頤奎次詰奎進士女韓鎮杓武宣傳朴奎應鄭然奭進士舜九名鏞韶將作即其玄孫也  
副護軍徐公墓表

李君秉燮齋其外王考副護軍徐公遺事問銘於余謹按公諱圭賢字一輔系出利川始祖新羅阿干神

逸歷麗至 本朝懋巖山甫文科掌令謫濟州子孫  
因居康津同知順載通德聖權曰景屋曰永漢高曾  
祖禰妣光山金氏孝寬女以 純祖丙寅生年纔就  
傳受曾先之史畧謂此不足為做人樣子請讀小學  
孝經等書塾師異之風骨俊偉性情溫良平生口不  
鄙悖衣不奢華事二親養極志物兄弟五人友愛篤  
至當析箸田宅器物自取其荒頓朽敗者曰吾所安  
也宗族中孤貧無依者到底收恤俾不失所值艱饘  
粥哭泣歛殯葬祭一遵禮制墓在百里地月一展省  
風雨不懈平居興至則輒備酒肴請隣里文人善士

諷詠自適不知世間榮辱得失之為何事聞人善如  
不及見人有失必從容開諭期於悛改宗族致敦睦  
朋友盡忠信勸子弟以孝悌忠敬此其狀辭大略而  
亦以口傳口之實蹟也壽八十七而卒於今 上壬  
辰塋在綾州文峙甲原夫人礪山宋氏興晚女舉一  
男四女男斗寅女崔達俊李之茂閔基鎬梁八默斗  
寅男長政錫次洪錫元錫女尹滋奇嗚呼昔我先王  
重民五教雖海隅僻壤草門編戶之微苟曰孝於親  
忠於國莫不搜羅剔抉猶恐或遺蓋將樹彞倫於無  
窮範民俗於將來也而今亡矣李君所以苦心收拾

或恐泯然者良有以哉

副護軍黃公墓表

公姓黃諱性業字不傳階通政大夫龍驤衛副護軍  
系出昌原墓在光陽郡古里畚峙負甲之原父鍾軍  
資監叅奉大父萬卷軍資監主簿曾大父後憲成均  
進士高麗門下平章事檜山君石奇其受封始祖母  
黃氏籍紆州公值壬辰倭變與兄通政大堇洎翁嗣  
業相與謀曰見今君父播越家廟被燼公私之難豈  
但已哉遂率家僮及民丁若干伐薪遮谷口散伏林  
藪間乘夜窺賊陣賊以革囊為蔽身之具囊可容數

十人賊皆裹頭覆足依阡而宿告其兄曰吾無尺寸  
兵難與爭鋒若括其囊口取其兵器左右擊刺事可  
濟矣乃因其睡熟率眾知委適伏兵猝起砲礮亂發  
通政公形貌魁偉聲音如雷賊一見甚加器重誘降  
不屈驅而前之拘囚沙漠公與弟脫身共負父母入  
白雲山穴處實食晝伏夜行艱危萬端而唯以親不  
得安養兄不可復見憂形于色與人言輒流涕既而  
亂定我國士民見俘者稍稍生還而通政公亦與焉  
計其日月殆近十數年蓋當亂離板蕩之餘二親無  
恙棣床團聚享用平康苟非孝友之實積在中而天

人之助應於外者其能然乎公娶魯州鄭夢龍女三男之崑之益之尹孫曾以下不盡錄十世孫炳中以門父兄命致不佞曰吾先祖距今三百餘年文獻斷續並與生卒年月而無徵其他可知也方立石以表之願丐一言以申之余不能以老病辭遂依狀叙次以警樵牧云

晚歎齋李公墓表

公諱安信字士式其先德水人穆陵朝有南部叅奉璿號竹谷於栗谷先生為伯兄公其九世孫也是生景震叅奉號臨湖是生穢叅奉是生厚根 贈左

承旨是生絢 贈戶曹叅判五世以上高祖聖翼曾

祖正彙號默窩篤學力行為李陶菴尹屏溪李牧谷諸公所推重道刻繡啓並不調壽秩僉樞祖復彬與兄泰彬同學寒泉門下考魯觀好讀栗翁宋子書承述家學妣延日鄭氏通德即慈女曰魯元海州崔氏其本生父母公以英廟丁亥生自少性度沉重氣像渾厚在親側恒怡愉聲色務得歡心既壯遊學四方以性澹宋先生為師梅山洪文敬為友徃復酬酢蔚有聲稱前後喪居廬盡制衰麻不去於身哭泣不絕於口疏水三年饋奠必親每日蚤起拜謁祠板朔

望則參禮訖雖風雨省掃墓庭所居海州距坡山三百里強生庭忌日必躬往莅之及其老不能馬則或紙榜行事禮雖無據其篤於所生如此平居恒對方丹古今典籍皆所貫通鄉鄰士子或有疑難問質文字懇請輒隨遇接應未嘗凝滯行至先賢過軀舊址或杖屨經過處便徘徊俯仰慨然有微斯人吾誰與歸之意蓋其性根好善師友講習之力不可誣也  
純祖庚寅李尚書翊會觀察畿輔以歛迹自守嚮俗知警為道啓薦目海州舊有栗谷先生鄉約例擇縉紳士林中有德望者為鄉憲至是乃以公舉擬 憲

宗庚子李尚書光正掌銓首擬 齊陵齋即未蒙  
天點以其年七月十日考終于寢得年七十四葬海州高山先塋坐丑之原配旌善李氏德海女墓合柩子男敏坤孝友克家孫男配永紀承配永男種園種鎬過房種述種久種德遺稿二卷佚不傳惟花石亭重修記一篇附見於亭之事實種德不佞舊要也今在金石之役不容以老病辭

漢隱崔公墓表

綾州治南閒閒洞有坐丑而封者故漢隱崔公諱時伍守士明之藏公之孫煥琪謁余以表阡之文謹按

公海州人麗朝文憲公諱冲為鼻祖後有文和公惟  
善良平公忠齊文清公愷忠憲公有渾輝映史乘入  
我朝贈吏曹判書慶長當龍蛇之變見其第慶會  
殉節即為繼義兵將在公為八世祖也考培俊妣全  
州崔氏應杓女公生八歲請讀古人書佩服父師教  
早失所怙奉偏慈以誠常曰事親不能養志則雖日  
用三牲未足為孝遭艱哀毀幾滅性噫即此數事亦  
可知其為好善務本之士也以 哲宗壬子卒距其  
生 正宗庚戌 年六十三夫人晉州姜氏柱贊女  
舉三男雄秀震秀泰秀雄秀一男煥允一女適尹相

龍震秀系男煥奎泰秀二男煥琪煥吉

感慕齋金公墓表

金君榮湘為其曾大父感慕公葬在茂長石井山坐  
酉之原丐以豎表之文余謂顯而刻幽而誌子孫至  
情非只欲不明不仁之免於目前亦厚望善繼善述  
之來裔於無窮耳然家傳瑣錄斷不若公共士論乃  
就其當日薦報之狀而參互折衷則勿失所怙遵奉  
慈教刻意攻學克述先業此一事也教誨式似文行  
相將述工之子累中鄉解明經之兒連登華榜此二  
事也設置義在荒年窘節簡遠近族不能自食者節



次賑給免於凍餒禁釀勸農里無沽酒之戶野罕遊  
 手之輩此三事也儲經史時糧餉資其無書而不能  
 讀者欲學而力不贍者此四事也噫有一於此尚可  
 為難况兼焉者乎可書也已公諱亨瑞字常會壽職  
 同中樞其先安東人麗朝上洛伯方慶為遠祖傳至  
 永慕堂質考妣及承重廬墓十二年以孝聞 皇明  
 本朝 睿命旌閭五世祖隱松堂景哲以學行官南  
 原府教授享道巖祠曰澌曰尚衡曰聖寶曰圍行是  
 為四世妣海州吳道中女 英廟癸酉 純祖甲午  
 其生卒配咸平李氏國煥女墓合祔男世基錫基必

基在基錫基男養微養鍊養默養化女適辛有貞鄭  
 儀奎丁孝哲必基男養豐養祿為世基后養彩養性  
 養徹養國女適金在杓在基男養湜養欽女鄭鍾鉉  
 尹相顯內外孫多不盡錄銘曰  
 事孰為先孝友睦嫻思不出位以遺後人蔚後石井  
 有封四尺刻詞于石警示樵牧

樵隱廉公墓表

愛親敬兄性本具我初無古今人之別著在日用  
 亦非高遠難行之事而有能有不罷者特為與不為  
 求與不求之間耳樵隱翁享年六十有一文字不及

於著述足迹不出於鄉黨而乃考其平日行為則其  
事親也用天因地養極志物以至友兄弟睦宗族教  
子孫購窮恤貧皆言足聽聞究其實則特因在我之  
性而就日用間加提撕警察之工耳夫人之所難能  
而翁能之可書也已翁諱在勳字子欽號樵隱廉氏  
本坡州以麗太師孝文公信若為遠祖傳至忠敬公  
榜臣出入將相為玄陵名臣李拔隱撰神道碑是生  
國寶瑞城君號菊坡與圃隱鄭先生建議朝堂請行  
三年喪及衣冠遵華制於翁十六世以上高祖層夏  
監察曾祖德立 贈司僕寺正祖恭胄 贈左承旨

考聖祐以孝 贈戶曹叅判妣 贈貞夫人高靈申

氏天祿女生 純祖八年卒今 上戊辰墓在寶城

鳳德面斗舞洞坐卯之原後九年丁丑因士林上言

贈司憲府監察配 贈淑人河東鄭氏考奎臣舉三

男二女男復鉉佐鉉玪鉉女金彥植李昉會復鉉系

子宅洙二女李教元安圭殷側出男敦洙振洙佐鉉

一男鏡洙三女尹正學梁鶴煥文在慶玪鉉四男宅

洙過房必洙根洙銀洙側出男甲洙大洙小洙女幼

餘不盡錄

芝隱崔君墓表

君諱成鎬字周京耽津崔氏其先自麗朝平章事莊  
景公思全始貞簡公沃益山郡守膺選為入我顯祖  
曰山海曰性復曰鎮邦曰奎煥是其四世並有贈  
典外祖叅奉姜安會籍晉州生憲宗已亥卒當  
子甲午壘鎮安菜山下老洞負庚之原配興德張氏  
文奎女壬辰功臣司諫以吉後有婦德先君八年卒  
墓各窆二男一女男長濟泰中樞院議官次濟學女  
適金驥述濟泰男殷相哲相濟學男相殷相男炳  
基君幼穎悟及長習公車業屢登鄉解不售晚夏歛  
退常以孝悌忠信謙讓恭儉為修省之本見人善若

已有之聞人惡隱而不宣性輕財丙戌大歟傾貲設  
賑賴以全活者甚眾朝夕玩繹恒在庸學二書所揭  
壁而寓目者不越乎九容九思心箴等文字丙寅洋  
警擬與同志人舉義賊退而止此其事行大略也是  
宜享用平康食其善報而不幸東匪煽亂短狐射人  
瘦狗吠主所嚮糜爛禍甚洪流君乃無所因而遂及  
焉噫亦命也歟余悲其遇而不忍翹然於孝子之請  
也乃依狀叙次如右

贈童蒙教官金君墓表

嗚呼此沔川郡松巖面壽山負坤四尺而封者故孝

子 贈童蒙教官金君衣履之歲君諱商翊字伊仲  
生卒三十一平居好讀小學書覃思力行手不釋卷  
日用服食務從儉約不事華靡親疾血指延數日喘  
居廬啗素三年如一日今 上二十四年丁亥 命  
旌閭噫當人歎交雜之日天顯民彝掃地盡矣而仁  
義忠孝之說往往著聞於閭巷蓬蒿之間者亦不死  
之人心而常存之天理也吁其偉哉金氏其先慶州  
人歷麗迄我世有大官聞人爲東方鉅族不須譜也  
高祖漢相師事久菴尹先生文行學識爲士林矜式  
曾祖樂柱祖魯煥考義載 贈司憲府監察妣昌原

黃氏考仁奎夫人全州盧氏仁基女莊靜端淑婦德  
克備夫病裂指生先君二年卒後君三十五年墓祔  
左男長秉濟出系官監役次匡濟蚤歿秉濟二男長  
秉旭進士次秉勳系匡濟后匡濟女清州韓琛教上  
舍君懼其先懿之將泯而無傳也袖其狀問銘於余  
不容以老病辭銘曰

人有是心其德曰仁發而爲用先於愛親君姿惻怛  
天厚厥植苗而不秀厥理孔忒刻詞阡途以警樵牧  
贈戶曹佐郎李公墓表

當寧丁卯四月十三日韓山李公麟溥卒年四十二

始葬先塋壬辰因士林狀聞 贈通訓大夫戶曹佐  
郎庚子改窆于化寧縣魚山西壬坐之原夫人安東  
權氏巖女卒後公三十三年墓柩左公生而失恃甫  
齒值忌日能坐而待曉叅哭乃已既長事父甚謹問  
寢視膳未嘗一失其意躬勤稼穡可口之味適體之  
物莫不畢給於奉先釧豆之品寧潔無豐友于羣第  
食不異糧衣必均服以至教子姪恤族姻賙婚喪律  
身儉約接人坦率者一是足於聽聞而無愧為小學  
中人則子夏氏抑揚之論殆其近之惜乎天闕其年  
不能大有所成就也公字角卿李氏以稼亭牧隱為

顯祖八世忠貞公顯英 仁祖朝官吏曹判書航海  
朝 京蒙鐵如意竹石圖陣 賞賜高祖萬憲號遜  
廣 贈司僕正曾祖光佑 贈左承旨祖時穆考庚  
年妣慶州金氏考膺烈公有四男三女男長命植延  
安郡守次龍植進士昌植 崇陵叅奉宗植嘉義東  
萊府尹並趾述無怠蓄穫不休無宴安歧徑之憂有  
處善循理之樂所謂畜於躬而裕於來者殆亦準備  
語也女叅奉金聃永廬性夏鄭鑑孫男德珪祿珪  
學珪極珪外孫男金教林敷林虎林珪林餘不盡錄  
銘曰

唯行有百孝為之元友為其次同出一源夫子有訓  
是亦為政觀此銘辭庶不我病

學生梁公墓表

走迫在梁斯文柱承之懇述其先處士金溪公狀矣  
處士從弟曰德洙字在明在斯文為所生父 純願  
丁亥 當子丁酉其生卒龔台院蘆嶺負卯四尺而  
封者即其藏公早失怙怙奉偏慈務極甘旨擔薪負  
米凡鄙俚之事靡不躬親既而金溪公中途歿逝上  
有癯老下有幼女門事剝落公遂舉室合于宗家勤  
稼穡奉祭祀接賓友養老恤幼動由至誠伯父嘗對

人言曰其之孝於其母固當然也養我至誠始終不  
替雖孝子慈孫莫以過之自奉儉素不尚華靡待宗  
族篤恩義訓子翁有法度恒以先義後利廉恥禮教  
等事諄諄誨諭嵒堂李公象秀僑寓鄰比公即與友  
善託其二子焉母夫人享年八耄公亦老矣居喪哀  
毀執禮不懈嘗以蚤孤且貧不克善養為至痛每言  
及輒泣下嘗言血氣所使鮮不害事能於忿時遽忘  
其忿而一以理勝之亦可見外物之不足為吾病矣  
噫公之行其他可及也而至若此等去處雖先輩復  
起無以易焉則子夏氏吾必謂之學矣者殆亦預備

語也曷不臆哉考諱鍾天妣吳氏貫寶城考亨履先  
系具金溪公狀文配文化柳氏恒均女四男一女男  
長柱承過房次柱河柱文早卒柱老女適綾州具奎  
喜孫曾不盡錄墓之有刻古也不容以老昏孤仁人  
孝子之情云

感慕齋鄭公墓表

余於方丈之行聞一前輩行義修潔而不見售者曰  
感慕齋鄭公諱命臣字世彥其先海州人五世祖諱  
文孚文科叅判號農圃壬辰倭燹以北道評事有討  
賊功光海朝坐詩案被慘禍士林俎豆曰大榮生員

痛父非命南下晉州因地名號鳳谷 贈執義曰有

頑 贈承旨曰楫進士號四無齋曰相吉號東洲從  
遊寒水齋權先生以行義入薦剡是為高曾祖禰妣  
晉陽河氏潤雨女公稟姿秀異孝謹明敏著自幼年  
四無公嘗稱述家聲者必此兒遭父艱執禮如成人  
每於無時哭甚哀四無公聞甚憾公自是不敢任情  
朝夕饋奠外晨昏洩哀必於墓所風雨不廢叔父相  
虎為伯氏蚤歿還為團聚公事之如所生與羣從昆  
季日夕湛樂以式好無猶為真詮奉養王父志物兼  
備逮哭承重易戚並盡鄰里鄉黨一辭稱孝子無間

然嘗謂門子姪曰聖人設教明倫爲先若輩諱明外此何求文華亦其末也噫此可以觀公矣以天年終塋在傳世先塋卯原所述文字諸賢輓誄並入贊攸無可攷徵惜哉配盧氏姜氏七子孫曾玄衆裔在先碣玄孫閻教謹慎好學余託蓬麻之列於其金石之役不容以老病辭銘曰

人有內美鮮不銜飾養晦含章維公時克天賦孝友有光世德我銘斯石以警頽俗

通德卽慎公墓表

嶺之安陰有一前輩制行修潔而坎壈而終其身者

慎公性天字浩汝卽其人也謹按居昌之慎遠有代序歷麗迄我聞人達官世不絕書曾祖諱杓壽秩通政祖諱守儉考諱道明號老山妣延安李氏昶之女公生有美質自幼少時已知事親之道適口之膳未嘗匱乏及疾心憂色沮衣不解紳夜不交睫謁醫問劑禱辰血指靡不用極而自誓至羣蔬食水飲一從禮制墓在踰嶺十里日必哀省不以風雨或廢平居每展謁家廟退坐書室勸課子孫不出孝悌忠信等事以至敦宗族信鄉黨並蔚有可述蓋其言行相顧內外交養雖本於家庭薰染而學文之力不可誣也



生 英宗乙巳卒 正宗乙卯享年七十一 塋縣之  
九蘿谷枕甲之原配河濱李氏 鼎協女 五男必觀必  
履必復 執義必鼎必升 必觀無嗣 以必鼎子在弼為  
子 必復男在文 在式 在聖 女金錫 孝進士 魚用 徹金  
厚 相必鼎男在弼 過房在勉 女鄭海 有必升男在經  
在錄 女卞 致允在弼 男炳雲 炳烈 女全在厚 在文 男  
炳琛 女梁 憲圭在式 男炳倫 在勉 男炳泰 炳錫 炳允  
炳璣 在經 男炳均 炳五 過房炳教 在毓 以在經 子炳  
五 為子 餘不盡錄 炳雲子宗鎬 炳烈子宗堦 以門父  
兄命屬余 豎表之文 因念朱先生 辭人誌狀之託 而

勸其立身 顯名 此諸已而不此 諸人務其內而不務  
其外者 其旨深矣 尤豈非惕然反省者乎 遂按狀叙  
次如右

嘉谷尹公墓表

尹氏諸貫 茂松居一 其先出自高麗 大司成 諧 歷文  
貞公 澤 文安公 紹宗 文度公 淮 文憲公子 雲 事功名  
義 著載史 乘不須譜也 曰達 漢進士 曰淨 進士 從金  
東 泉 湜 金 慕 齋 安國 學 曰起 商 將 薦 至 水 軍 節 度 使  
曾 祖 祖 禰 妣 淑 夫 人 瑞 原 徐 氏 正 即 道 修 女 公 諱 璿  
字 公 憲 天 姿 粹 美 親 瘠 斫 指 進 血 及 喪 葬 揚 州 嘉 治

谷廬墓盡制因家焉號嘉谷奉備慈愛敬備至與兄  
水使公友愛彌篤常怡怡如也敦撫宗族恩義交孚  
孝友之道備矣少從栗谷李文成先生遊又同族祖  
希菴公瑱出入朴鼎山洞門絕意仕宦潛心古道一  
以忠信爲主管作詞以自警其略云歲環五十知非  
衛武九十作戒古人猶能如此後生豈敢或懈苟昧  
聖凡攸分焉知人獸大畧要在主敬集義惟日斯征  
月邁公之問學舉其槩則又如是矣 穆陵朝道臣  
繡衣相繼薦孝行才學特除繕工監監役尋遷司憲  
府監察並不就乃以 萬曆丁丑八月四日卒距生

嘉靖辛丑得年才三十七士友聞之莫不嗟惜並先  
公墓下丁坐配淑人靈巖朴氏 贈吏曹判書處儉  
女墓祔一男應時工曹叅議以忠孝節行聞孫男曰  
泗司直 贈叅判曰沂僉樞並有儒行曾孫男殷聖  
僉樞 贈判書號守本齋世稱大明處士 崇禎甲  
申聞 烈皇帝殉社痛哭入白華山中以終老焉十  
一世孫昊師事故持平省齋柳公蓋亦與聞乎道器  
上下人歎貴賤之別而懷風泉之感者謂余與省翁  
爲同門之列也猥託以豎表之文不容以老病辭銘  
曰

年位俱畜隱德孔盛惟學與孝實我起敬爲著墓銘  
昭示後來君子之瘞人其式哉

贈叅議崔公墓表

茂長舊有一善士崔公世輔字誠徵其先慶州人考  
曰頽聘仁同張氏仁傑女舉丈夫子三人長世寬次  
世榮其一閔腹卽公也張氏居夫喪三年畢謂二子  
曰余志有定而不能致命於汝先君屬續之日者知  
其有腹中兒也今爾等年已長成並有家室從遊文  
會略涉書史自茲勉厲不失家聲惟在用心勤慢見  
彼幼穉亦才免懷學語索飯庶可保命遂仰藥而逝

公稟姿孝謹事兄如事父待丘嫂若慈母左右服勤  
罔或少懈餘力讀孝經小學等書恒言人皆有父母  
繫我疇窮在孕失怙三歲失恃養不得一日喪不服  
三年乃終天之痛而徹地之冤也過時追服禮雖不  
著緣情義起庶無大過因忌日發喪制服廬墓盡情  
各三年以終又謂君父一體義無獨殊每值 國恤  
設壇洩哀不近酒肉此皆隣里士民之所一辭誦傳  
而無異同者也噫以無於禮之禮成就得出人一等  
之行苟非性於仁者不能詩云民之秉彜好是懿德  
其信矣乎崔氏以新羅文昌侯諱致遠爲始祖迺德

即起崙 贈參判仲福六世若七世曰春復曰戎男  
同敦曰厚憲祖曾高生 肅宗辛巳卒 英廟庚寅  
葬侍墓洞先塋坐癸之原 當子丁亥以母烈子孝  
並施綽楔之典臺職銓啣榮及泉途蓋亦異數也配  
贈淑夫人延安車氏益武女墓合祔五男長廷岳次  
恒岳載岳過房仁岳南岳女適余養秋玄孫聖源講  
不明不仁之戒袖狀請銘銘曰  
惟烈與孝維帝之則教弛俗頽民鮮其克一門並美  
於公始覲刻詞于阡警彼樵牧

櫟叟安公墓表

公諱潤身字子粹櫟叟號也安氏其先高麗大將軍  
邦傑以軍功封廣州君子孫因籍焉中世侍御史綏  
自廣州移居咸安入我 朝有諱夢得官勸農判事  
是高祖以上曾大父勇智文科歷典郡邑大父宙號  
恥菴除寢即友就職路中聞靜菴趙先生邁禱遂稱  
疾返絕交百齡疏斥元衡始卜居于慶州虎鳴洞父  
應忠蔭忠順衛聘昌寧曹氏元亮女無育以從父兄  
奉事應權第二子子之即公也 明廟癸丑生 宣  
廟丙子登司馬壬辰值倭警再從翁縣監潤憲庶弟  
訓導瑋並殉節東萊公奉母夫人避兵于竹長山中

立愷家妻孥及傷邑姻戚士友之無所於歸望門來  
投者一體引接賴以全活者甚衆至若再從兄龜巖  
瑾從子信命再從侄誕命以命之倡舉義旅修葺火  
旺山城出戰入守效績錄勲皆賴公籌策亂定鄉人  
將以行義薦遂力沮其議光海讎 母朝令頒郡邑  
公覽未畢輒手擬投地曰天下焉有無母之國乎嚴  
飭子侄勿應舉親知中應北人科者絕不與通權梅  
窩士諤友婿而莫逆也公嘗贈詩云中宵推枕正淒  
然忍看裊氛漲海天文武恬嬉終敗事華戎各義孰  
能全雨漂粟土懲鴟鴞春入冬青哭杜鵑從古和讐

皆謀國邦當披牖王旒前權公和之曰君詩一讀一  
潛然此意真肫可質天天普皇恩頭共戴鬼蜮蠻媿  
信何全藿山歲暮歎無虎陵樹春殘吊有鵲聞道唐  
兵留嶺寨誰將覆轍更懲前金公裕憲見之歎曰若  
使二公位諸巖廊有所施設豈容使萬斛長腰輸之  
海外哉噫不待後世之子雲堯夫而可不朽公矣爲  
學一主忠信雖流離艱險中必以小學四子等書隨  
之正坐尋繹晨夕靡懈教門子弟專以聖人軌則課  
日聽講不許作博士業尤以見所養之萬一也墓在  
秀崑坐乙之原配月城孫氏考光皓寧越辛氏考叅

奉德麟二男一女男長聃命同中樞次永命軍資監  
直長號大明居士女適都事崔現孫景海俊海女辛  
榜立李興佐李忠敏李稍遠長房出鸚鵡女孫宗夏  
崔東慎次房出

晚覺梁公墓表

讀小學之書而信其為日用常行雖老師宿儒未必  
盡然况於童幼時節善惡不分嚮背靡定者乎晚覺  
梁公上學之初已辨許多道理盡在是書不只看作  
八歲小學之工程者苟非資質知慧之出人一等斷  
不可能即以修於己者口不道鄙俚之言耳不聽滯

亂之聲目不觀奢麗之物行於家者事親極其孝處  
宗族如一室教子弟有禮義溝壑幾十年唯耽索墳  
典嘯咏風月不知老之將至者殆令人而古道也公  
諱漢永字春甫系出濟州生以 英廟壬申卒於戊  
寅墓在綾州大谷面星有洞午原夫人豐山洪氏永  
祿女有婦德墓冬窆有二男相豹相麒相豹無嗣以  
從子孝默為後相麒有四男一女孝默過房悌默仁  
默斗默女適文致郁孝默男在弘悌默男在成在海  
仁默男在川斗默男在寬餘不盡錄

二未齋金公墓表

近故二未齋金公諱基宅字殷叔年七十五今上  
癸巳正月卒其年三月塋于漣川治舊校澗負良之  
原按狀公清風人東泉先生文毅公諱湜同中樞睡  
窩諱塔十世若六世皇考諱澗默通德卽妣豐川任  
氏考百馨生 純祖己卯性根孝友內行甚篤皇考  
患眩症差劇無常輒衣不解紳夙夜殫誠慰安扶持  
三十年如一日姊氏蚤寡迎置同室服食禮節罔有  
異同期功兄弟十餘人式好無猶庭無間言每日未  
明而起夜分而寢耽玩書史手不釋卷吉凶禮式必  
誠必敬雖在宅人類躬親照管毋或差誤凡營私計

利傷廉害義者視之蔑如族叔重菴翁師事華西李  
先生道義風節望重士林及其還自海上臯比密通  
則公尊信尤篤命門內後生恭執弟子禮周旋服習  
有以聞夫公私大小幸夷人數之別而無向外走作  
之患故一時月朝有曰分甘漁樵不取名利奴顏婢  
膝視之若浼曰孝於其親友于兄弟外言不入內言  
不出曰主敬行事學禮中節剛毅直方忠信好古曰  
善與人交久而能敬年自結髮不與人爭曰家有傳  
授學得其正士友矜式蠢愚觀感噫是可以聲音笑  
貌而致之哉配清州郭氏林翔女卒先公一年墓祔

無嗣取仲弟基寔子於善為后一女適都事徐炳俊  
孫男長益櫓次益模益薰女李徹承李鳳承余栝公  
蓋嘗挹其表而承其論深知恂恂長者也今於表阡  
不容以老病辭銘曰

清城顯閎世傳名德公姿善信無待乎學譬彼崇蘭  
其種必馥猶玉有璞不刻而琢皓首林樊教誨式穀  
承先牖後履道貞吉

遯川申公墓表

不佞與明菴居士申君校同師華西李先生於溪上  
老大相信可謂姓不同兄弟也述其先大人道爭屬

以豎表之文竊念平山氏東方巨族而松谷公一派  
世居青域名義家風莫與先焉鄉里公評不可誣矣  
蓋公內行洵備幼丁外艱饋奠受吊依如老成奉偏  
慈極其愛敬出入得珍味不先於口治公車藜不魯  
南省見親有不豫色謂得失有命而僥倖萬一反歸  
不孝輒斷迹荆園力田顧養伯氏為諸弟矢教以身  
先之而斷飲自厲則亦言下服膺終身不酒恒言人  
生在勤勤則不匱萬事在誠不誠無物故其所自勉  
而勸人者大而講孝悌忠信之道以立其根本小而  
賦葛覃七月之篇以全其性命惡衣惡食不以為恥



外物芬華視之若脫蓋其重內而輕外得深而誘小有如此宗家零替孤寡無資公即以分財田納之使之依賴趾拙公旋命久未祇受至是乃營建記文即李先生筆也值歲歉家無長物賣一小犢以救宗族中不能自食者居鄉恂恂不設邊幅而於金重葢平黠姜作即永夏交契最密二公之獎詡亦甚重其孝先敦族愛衆而親仁者文如是矣公諱命健字穉順因所居號遜川生長老皆於斯晚居湖西之庇仁享年七十六當寧甲申卒今陽城栗北面栗里良原即其葬父諱瓚大父諱大熙曾大父諱馥高祖諱

胤夏即趾拙公敦寧叅奉諱坤世稱大明處士贈掌令諱礪為栗牛二先生辨誣壬辰殉於孝號松谷乃其七世若九世而麗朝壯節公諱崇謙其始祖外祖通德即利川徐俊民齊唐津韓氏生員邁女墓各窆三男一女男長穰次穰辛巳陳歐之禍被刑幾殊竄絕島華夷誦其名次即挾固窮尚志為士友推重孫男女不盡錄銘曰  
我田有稼我家有政衡泌窮約我付之命于嗟乎斯人今人其誰與並

進義副尉吳公墓表

此文義縣西距達溪乙麓馬鬣而封者故進義副尉  
吳公諱叔全歲謹按吳氏湖西望族其先出自中國  
麗初武惠公瞻始登系牒累傳至賢輔賢佐賢弼三  
昆季分派賢弼貫寶城麗末平章享天福 本朝禮  
儀判書漸其祖若考聘兵使元繼宗女生四男長仁  
政次仁憲仁厚仁禮伯仲叔後承最繁衍上下數百  
年聞人達士世不絕書槩而言之曰進士名立處士  
裕立縣監中立都事行健萬戶大男縣監再道以節  
義著曰通政景禮參判俊立佐即尚健尚晉教官振  
澤鼎基以孝行旌閭曰參奉士英縣令混參奉善謙

教官秀筠天以惠明壬丙舉義曰承旨燭居官清白  
享以俎豆曰通政廷立進士時立振淵別檢益升再  
挺進士宗漢持平啓宇並尤門淵源曰應教瑞鍾辛  
壬被禍其宅名行亦彬彬可述言足聽聞噫根深則  
末茂源遠則流長因後孫名德之實而推其兩本則  
宜知為公不食之報而所謂黃流不注於尾缶福澤  
不降於淫人者尤可信也夫人籍原州墓祔左舊有  
短表曰進義副尉具公叔全孺人原州元氏之墓  
弘治八年三月日改葬二十五字此其遺蹟也裔孫  
將易而新之謀及於不佞遂忘其孤陋略書之如右

請文者后孫洲國聖秀其名

羔峰安公墓表

南原安君泰燮以其先祖羔峰諱瑀字仲溫狀請余為銘謹按順興之安遠有代序麗朝晦軒先生以儒術大鳴於世推為東方理學之祖配享聖廟自是奕葉相承多名公鉅卿有曰南學教授璣弘文博士思齊堂處順竹巖處士瑑金泉道察訪昌國清道金氏僉知麟祥女此高曾以下及外氏也 萬曆辛卯仁廟某甲金陵黑城山俱隸南原府此生卒里兆也全州李氏察訪克扶女男長壽恒次壽玄壽徵女鄭

世昌李章遠吳洹此配位子姓也蚤失怙養母夫入極志物病而葬而嘗糞廬墓敬祭祀敦族戚信鄉黨甲子適變與同郡士五六人倡義勤 王將指日西上聞巨魁授首王師解嚴則遂以兵糧器械納于官退然若初無是事也又平生行治及移孝為忠之梗槩也夫當國家有事之日雖職任封疆居在官守類依違顧望自陷於遺親後君之科者踵相接也其以草野葦布奮畢義願忠之誠而圖舒國亂斷知其出於無所為而為者不容以事功微著文獻踈略差殊者也噫見今東魯化戎蹄迹交橫而人道幾乎熄矣

藉使公九原可作而目擊今日父象則其奮身敵愾  
誓不共天者又不但如是而止著之不可已也遂歎  
息而書之如右

自守翁李公墓表

稱於宗族誦於鄉黨而曰忠信善士則斯可矣天冠  
山下萬年之洞有隱淪之士仁川李氏號自守翁者  
其人也翁諱源大字亨叔年十二丁父憂執喪如成  
人奉母李氏暨祖母柳氏晝幹夜讀養備志物叔父  
性嚴怡愉盡誠得其歡心處四弟二妹友愛彌篤貴  
產服食無異同好善惡惡惠人愛物多表表可述實

浮於名故自鄰比族戚間巷婦孺一辭稱誦少無間  
然斯不亦不學而能者乎享年五十一而卒於今  
上丁丑葬在馬吃先塋坐乾之原配廣州李氏考鎮  
皞事舅姑盡孝奉君子無違禮先公十六年卒墓金  
剛里孝竹洞庚辰李氏自邵城伯許謙始至左贊成  
恭度公文和為入我顯祖自後願大繁衍珪組也清  
白也儒門淵源也斑斑有可據者竹松堂憲徵吾吾  
子在中竹窩一鎗是其三世並以行義聞一男守根  
一女適白冑寬孫男長典遠次震遠外孫男亨七守  
根十年舊要也志切闡先問刻於余遂力疾書之如

右

竹峯高公墓表

臨城千界違章炎麓粵有名區寔曰竹峰襟滄江而帶栗浦控杜域而接沛鄉故處士高公諱用楫字濟卿生於斯長於斯歌哭於斯享年七十四而卒於英廟乙卯幼性篤於孝作詩語輒驚人稱神童及長善文章屢舉不售退處林樊潛心經籍研與唱酬往復結道義交者北軒金公也喪過乎哀祭致於敬睦親恤貧曲有恩義以善及人入無老少貴賤咸傾嚮之英廟初服上章臚列一鏡等罪惡劈蕩平之

論又與鄉中章甫疏請鳳巖書院 賜額及井邑縣

初達允菴宋先生廟宇其扶植世教尊賢尚德之苦心血懇儘不誣矣葬在建章山東麓友坐之原高氏其先出自耽羅在高麗文忠文英兩公最著入我朝簪紱相承生員諱堅宣傳官夢辰通政而遠曰必即其四世外祖寧越辛慶寧配李氏籍全州考之陽陳氏籍三陟權氏籍安東考斗綱三男長鎮屋次鎮壑鎮洪三女李尚白朴憲杜萬華餘不盡錄墓久無刻玄孫千鍾六世孫通政東沃謀立石警樵牧七世孫明煥以故徵士金公洛鉉狀屬余為文辭不獲遂

忘其陋拙藥括如右

鳴鶴亭鄭公墓表

鄭公諱樵字子開系出大寧以高麗侍中諱肅為上  
 祖歷至我朝世襲瑤組曾祖諱文孚兵曹叅判  
 宣廟壬辰以北道評事討平關北勲載國史謚忠毅  
 祖諱大榮生員 贈執義考諱有祐 贈左承旨妣  
 贈淑夫人載寧李氏別坐如漢女以 仁廟二十年  
 壬午二月生天姿純粹自幼服習庭訓循蹈無違事  
 親孝送終盡禮兄弟四人友愛克篤晚年哭二弟血  
 淚染襟文翰風範卓越等夷為世推重晚居于雲谷

之九曲村琴書自適徜徉山水以為樂蓋寓慕朱子  
 而取地名之符合也享年六十九而卒在 肅宗庚  
 寅始塋河東傳代洞後移此禮縣於安洞丑原以子  
 壽貴 贈戶曹叅判配冶爐宋氏考時哲墓村左昌  
 寧曹氏考時進墓傳代庚原密陽孫氏考莆墓村俱  
 贈貞夫人二男二女長尚燁壽秩同樞次尚燦女適  
 坡平尹晉來河東鄭希元尚燁生弘臣恒臣昌臣曾  
 玄以下不能盡錄來請文者其七世孫贊錫也

愚軒尹公墓表

公姓尹諱滋郁字敬三系出坡平高祖仁守號松梧

堂曾祖範殷祖萬衡考弘鎮俱有文行妣南平文氏  
啓祿女 仁陵丁亥今 上巳亥生卒葬綾州松石  
坊道良後麓齊光山李氏德弘女男相龍相鳳相龜  
相麟女適鄭琦鉉長房男基赫文赫二房男泰赫秉  
赫三房男濟赫采赫奎赫時赫四房男命赫公器字  
俊爽家貧未能專力於文學而畧通經史養親竭力  
奉先盡誠母夫人晚年失明晝宵侍奉未嘗離側飲  
食衣服出入苛癢必躬扶持一榻親意二十餘年如  
一日鄉黨頌其孝立門規置義庄親戚有病故雖癘  
疾不憚往救曰死生有命甲午東匪之擾會族隣諭

戒之俾免陷溺臨事只觀合理而不恤成敗行己只  
觀所修而不顧毀譽此其資行之美也相麟嘗請為  
表阡之文余許之而未能今相麟又死矣感念強疾  
書此以貽其兄相龍云爾

學生朴公墓表

公諱泰賢字仁彥籍密陽朴氏胄子羅顯於高麗我  
朝右叅贊諱守良號莪谷謚貞惠以文學清白爲  
中 明間名臣是生清節堂諱思愚鎮安縣監縣監  
生間適堂諱尚謹居昌縣監其五世以上高祖允誠  
贈司僕寺正曾祖就仁副司果祖草堂處士世大有

儒門淵源考崇孝妣崔氏籍全州柳氏籍高興考公  
澤公柳出生 英宗己未卒 純祖癸酉塋在長城  
府北工內洞先塋坐之原公賦性孝謹幼年侍疾  
能色憂嘗便喪盡哀祭致敬墓次省掃老而不懈值  
國哀三年廢酒肉至若貞惠公風節名業稱頌在後  
而節惠之典俎豆之享久爾闕焉公勢在竿頭慷慨  
奮發詢之于外而士論響應請之于上而朝議僉可  
百年未遑一朝修舉至誠透金石詎不信歟夫以君  
子躬垂之勤苟無好子孫闡揚張太則一世二世時  
移事遷因就晦昧者千居八九惟公以孝做本移而

顧忠追遠盡誠重先德殆亦之古人而亦難多得  
者也配蔚山金氏坡平尹氏長水黃氏墓並各窆二  
男載懋圭赫女適安志默載赫男重祐女丁文華李  
肇運圭赫男重祿重繪重翊重履女柳澈漢重祐系  
男洪震以下煩不盡錄余於朴氏諸秀先得二士曰  
萬升鑽容略聞其先德今來請文者名揚震於公為  
曾孫不容以生面固辭遂強其昏耄叙次如右

隨洞文公墓表

公諱秉源字季良文氏籍南平世居朗州之場巖隱  
德不仕以伯兄壽秩 贈其考重澤戶曹叅判祖祭



五左承上日曾祖在德司僕正妣 贈貞夫人清風金  
氏通德卽復海女生 純廟四年甲子卒今 上九  
年壬申葬屯德山獐項峙負甲之原後三十三年乙  
巳嗣孫圭政具書與幣屬其胤昌善來曰吾先夫父  
平日行治實有不可泯者今墓木已拱而不朽之託  
無貽於歸敢煩于下執事余以老病久廢筆研知舊  
文字之諾而未副者甚多旣例辭不能而因竊念闡  
先人之常情半千里重趼又不忍使之徒手而歸也  
遂撮其狀辭爲之銘其詞曰

志古人之學而身不霑於一命敦百行之源而述不  
出乎一緇然而子弟服儒素之訓州閭識遜悌之方  
確然持守誠敬之域坦爾周旋禮義之場其人不可  
見而其心若可見嗚呼噫矣我思之長

勉菴先生文集卷之三十三

勉菴先生文集卷之三十四目錄

墓表

學生吳公墓表

天性齋金公墓表

竹齋文公墓表

學生高公墓表

學生高公孺人林氏墓表

孝子吳公墓表

松菴鄭公墓表

權文益墓表

三宜南公墓表

希齋白公墓表

強窩洪君墓表

察訪 贈秘書丞申君墓表

河兼洙墓表

三松軒朴公墓表

懼而軒鄭公墓表

孺人密陽朴氏墓表

石湖李公墓表

烈婦清州韓氏墓表

慎菴文公墓表

僉中樞鄭公墓表

金孝子墓表

鄭仲儒墓表

曹穉周墓表

醉菴宋公墓表

雲林齋崔公墓表

密直司事郭公墓表

慕窩李公墓表

忍齋姜公墓表

隱溪姜公墓表

副護軍鄭公墓表

贈司憲府監察文公墓表

副護軍崔公墓表

通德郎許公墓表

梅竹軒李公墓表

拙菴崔公墓表

贈教官觀瀾鄭公墓表

處隱吳公墓表

勉菴先生文集卷之三十四目錄

勉菴先生文集卷之三十四

墓表

學生吳公墓表

此公州牛井面上美山負已面友而封者故孝子吳  
 公在河之墓也孫治義將立石以警樵牧徵文於余  
 余在鄰比之誼不容以老耄辭謹按公字清一籍寶  
 城敵愾功臣襄武公子慶為八我顯祖傳至諱中逸  
 號拙齋受業於池松亭達海門拙齋之弟曰進士諱  
 中喆號悛遷寓師事李士亭徐孤青趙重峯三先生  
 壬辰從趙先生倡義討賊于清州伯仲並以文行著

拙齋无嗣以悛遷公第二子益三子之生進俱中流  
靜真齋允齋宋先生書贈扁號以經學聞著鄉里於  
公八世若七世曰命豪曰重恒曰應鳳曰宗基是其  
四世妣禮安李氏鎮衛女繼妣萬頃盧氏順德女公  
李出 純廟壬申 當宁丁丑其生卒公生四歲失  
恃繼母性嚴難諧自幼至長事之一如所生晨昏定  
省出告反面未嘗放過親口所嗜雖遇在遠地必袖  
而供之家素窶隆冬盛寒衣履無全而必負薪煖突  
養極志物及喪年屬耆耄執禮愈勤友愛益篤日再  
展墓不廢風雨有三弟並廬出性或異同公一心友

愛庭無間言以至鄉中大會表以賞典者至再三焉  
聖人言十室必有忠信其信矣乎配利川徐氏無育  
萬頃盧氏台鉉女男明淳女林錫千孫男長治仁次  
即治義女李象璜曾孫男寅植繼治仁後次宗植昌  
植餘幼

天性齋金公墓表

為人要如何得為君子人斯可矣有子要如何得有  
孝子子斯無憾矣湖之舒川有一隱淪之士曰光山  
金公以天性稱號者其人也平生無他技能唯性篤  
彝倫心存愛敬年十三值歲大歉穀貴如玉親飢數

日假貸無奈輒於路次放聲而哭忽一人問其故而憐之傾囊米與之曰孝哉此兒速去供老不投且不道姓名因前進八九步無去處鄉里驚歎咸以為神明所感家素窶難為養乃暇田力穡或捆屨織席庸資事育隆冬感寒衣履無全而負薪爇親突旅次偶心驚即歸省母患河魚甚重醫云子夜水甚好乃秉燭守井連五夜及時取服所患即止及喪過乎哀自殯墓至祥禫情文備至伯兄及叔季兩弟後先病歿大小家事躬自照管靡有朝夕其子女嫁娶及制產教學等節一如已出親之平日所嗜終身不忍食見

老而服衰者輒惕然變色上墓必哭如鄭松江故事與後生言眷眷以孝悌忠信至其怠惰遊戲不事儒業者視之若浼其餘憂時傷俗以倭洋為不共戴天之讐毀服為變夷之張本而溪憂永歎者多表表可述而實浮名沒世不讓故鄉鄰老宿或為之狀或為之誌一辭同然少無有間斯亦君子若人乎今又胤子熹洙飭躬劬經講不明不仁之戒一一蒐輯與圖不朽而如余空疎亦肯踏跼左顧要一言以警樵牧斯不亦孝之一端乎推此以往靡不用極而惟善繼善述擴大先業成就高遠則斯為全體之孝詩

曰君子有孝子既爲公一誦而賀之又爲公子孫勉之公諱永彩字得瑞父曰利鉉大父曰在允曾大父曰箕汀政府三宰北城君謚恭安謙光爲十五世中祖外祖金海金時寬生 純祖乙酉卒 當子巳丑 葬院堂里負壬原配藍浦白氏考祭洙後公十年而卒墓豆山面北溪酉原一男卽憲洙二女韓山李王在全州李師善外孫承弼王在出也銘曰 惟孝與悌居家之政曰忠曰信本然之性商商天地能者幾入我闡其幽刻辭貞珉

竹窩文公墓表

公姓文氏諱永壽字極汝系出南平麗朝江城君諱益漸其鼻祖長興庫令穆勉修齋自修於公爲十一二世曰世萬曰光吾曰喜參曰赫鎮高曾祖禰四世也妣豐山洪氏永桓女公志局不凡幼與羣兒戲未嘗爭競年十餘值甲戌大歉瓶甕枵如與其兄常採拾爲養務極甘旨既又一室遘癘兄歿未殯父母俱危而外人不通公吞聲飲泣不敢爲戚嗟色露禱嘗藥洞屬靡措者殆數月竟至二親差復身亦無恙中罹兩艱哀毀饘粥終三年如一日自是益零丁疇涼艱危萬端人所不堪而恒處之裕如自以少小貧窶

不克專力文字為平生恨每於暇日追逐遠近士友  
之賢有識者以廣其見聞至若教誨子孫承述先業  
又終始惓惓未嘗有須臾間焉晚愛金鰲水石之勝  
結茅開徑飯蔬飲水道遙自適不知世間得喪榮辱  
之為何事真古所謂宗族稱孝鄉黨稱悌之善士也  
享年六十五而以乙丑七月二十七日卒塋在綾州  
道莊面芍藥峰下坐坤之原夫人公州李氏文吉女  
公之孫宅煥以狀來論不佞狀是處士鄭義林所述  
其言可徵於是乎書

學生高公墓表

高君禮鎮具石于其大父之所問刻于余余於君相  
知孰矣不可以病廢辭遂銘而序之曰公諱鳳煥字  
輝瑞自神人降于漢挈迄麗朝有封長澤君後孫氏  
焉至諱臣傳與我 太宗大王同年官北部尚書松  
京屋社自矢因僕遜于靈光高城山除戶曹參議不  
就生諱直克繼先志固辭掌憲之 命始寓興德於  
公為十二三世高祖在徵曾祖友聃祖漢民考克台  
俱有行義妣光山金氏致玉女公孝友天植六歲丁  
內艱哀毀如成人繼母崔氏生一男公事之如親母  
愛之如母翁稍長定省惟勤坐立如命嘗曰百行孝



為本失於此則餘無可觀矣故志體之養順而且忠  
正家也禮敬先於恩愛接人也卑以自牧不欲上人  
父母有疾醫藥外無餘事一日入山覓藥心忽驚動  
乘夜而歸已至危革未試藥而當大故是以哀戚愈  
過幾乎傷孝繼母於祥夕暗欲下從公誠諫得回甦  
每值父母忌辰不御酒肉哀如裡括常恨家聲零替  
構書室于別墅使諸子肄業性度寬而嚴不恒者必  
激厲而改之窮乏者必捐財而賙之及終無怛化意  
惟以未得終養繼母為恨願諸子申託以後事云  
純廟丁丑正月二十日 當寧丁卯五月八日生卒

十月塋于興德一南峰燈亥原配高興柳氏榮錫女  
男時清通政時銓時奭女善山柳弼大竹山安斗燮  
高興柳敏植長房男舜鎮承訓卽慶鎮德鎮禮鎮女  
蔚山金基洪次房男道鎮李房男澤鎮女恩津宋秉  
國噫公以草野特秀之姿不幸年壽未長一命不及  
可謂神理之爽而但其行治則有可述者存宜其傳  
示來世銘曰

蜂山峨峨兮其下也願人之官早篤天經兮可想百  
行之旁通肖孫克述兮天翁報施亦昭然貞石不泐  
兮名與齊壽于百子

學生高公孺人林氏墓表

公諱成鎮字興瑞高氏長澤人其先自高麗遂安郡  
事福林始歷兵部侍郎臣傳至麗谷開隱王淑玉湖  
四五世名義相承壬丙義蹟也儒門淵源也斑斑可  
述曾祖曰克楷祖曰鳳煥考曰時翼並有行義外祖  
興陽柳奎煥公孝友天植事二親無違禮處兄弟怡  
怡操心飭躬歛華就實人皆推重而天不假壽生卒  
僅二十二孺人林氏貫羅州考夢相歸來亭鵬其遠  
祖也孺人自在室有女士稱甫笄歸于公禮敬自將  
婦德克備無一不可道于外者年二十五產一子才

經初度值城崩孺人謂從一而從雖是當然奉老恤  
孤保全家聲乃未亡人責也遂慨然自力在祖姑及  
舅姑之側無敢作哀戚容教子自幼至長必以義方  
少有過差必嚴加叱責無所饒貸丁舅喪自家距墓  
殆七里許朔望展省三年如一日治家勤儉井井有  
法言不出外而事自整理平生喜施見人飢寒若恫  
在已夫之外黨避地來寓者與共衣食少無難色噫  
此皆可書而誦也享年六十二以 當子丙申卒與  
公俱塋二東面東山里負辛原一男濬萬孫男堯相  
舜相禹相女南原尹泰元慶州金基周側出一男曾

孫幼銘曰  
行非不修才非不茂壽獨不卑將安歸咎顯顯碩媛  
其儀不忒孝事舅姑始終如一教誨遺孤式穀似之  
我銘貞珉於千萬斯

孝子吳公墓表

見木猶可知山况於子孫而為父祖典型所寓者乎  
余有遠方之友曰吳君膺勉居海西之平山家世為  
儒孝友茶飯詩禮青氈嘗以狀來曰我高祖生卒六  
十四年無赫赫名有翼翼心入而事父母出而事長  
上寸長片善固多可記而言其大者則母夫人遭長

子憾遂至喪明輒心憂色沮謁醫調藥晝不辭紳夜  
不歸寢向日呼天口祝心禱至枕席間有滄淚痕望  
神效冀重明者至三十年之久而忽於一朝母夫人  
顧謂子孫曰吾眼復明知某知某完如平常人皆謂  
天地神明監臨孝子之至誠而有以致之及喪過乎  
哀杖而後起廬墓餼粥一遵禮制 純廟壬申登闕  
于朝特蒙 賜米肉旋有給復之 命則其實德之  
積於中而感應之著於外者不可誣矣願借一言以  
傳來後甚大惠也余不敢辭謹按公諱駿海字良仲  
系出高敞麗朝翰林學士學麟寔為鼻祖文行德業

士林俎豆事載東史傳至牟陽君季孺錄輸忠保節  
佐理安社功臣是生六和八 本朝仕至禮儀判書  
歷忠清兵使淹羅州判官榮廣興奉事景福至副司  
直冲鶴 明廟初服炳幾避舉與三弟共下西土世  
稱四鶴於公九世以上曰煥星生員曰泰基曰明夏  
曰敬麟僉樞是其四世並以行義著莖在弓位一里  
陶谷枕乾之原配全州李氏通德卽鎮健女閨範內  
則有古女士風墓各窆四子長鼎元出系次鼎洛孝  
友敦行鼎說鼎周孫男錫祿女金元植李記東二房  
出錫命錫仁壽嘉善錫謨錫光進士錫文三房出錫

昌女金亨植四房出銘曰

早業詩禮得津筏令隱居行義譽望蔚兮深愛積年  
神明格兮後承多賢報不食兮揭茲銘辭徵餘祿兮

松菴鄭公墓表

故成均進士鄭公諱屹字喜甫松菴其號系出河東  
自高麗平章事道正始高王考汝諧號避齋進士持  
平曾王考箕齡進士 健元陵叅奉王考昌廷 贈  
訓鍊院判事考天倫 贈戶曹叅議妣光山金氏通  
政天命女公以 萬曆丁未 肅宗己未生卒後  
贈漢城判尹三世之 贈皆以公子壽貴追 恩云

配南平文氏直長弘濂女六男文奎壽陞嘉善文斗  
文叅文亢文郁文謙三女適崔明錫金奉壽魏廷樞  
後孫等將伐石以表阡途而在洪甫抱家狀遠跡以  
請按狀公文詞瞻敏容質清疑嘗從桐溪鄭文簡門  
聞為學之方研理飭行居常歛衽如見大賓事親愛  
敬俱至侍疾斫指居喪廬墓忌辰致哀潔躬執供具  
崇禎丙子從安牛山倡義行至礪山聞和成痛哭而  
還杜門謝世等臺于家後山頂北向拜泣按節不用  
清曆桐溪嘗書贈陶靖節冬嶺秀孤松之句因以松  
揭扁手植盤松於庭吟哦盤桓人以盤松名其里葬

在綾州梨木洞丁坐巽夫人同原後人過者庶可式  
焉

權文益墓表

安東權君箕煥字文益丹城望族考諱秉天號幽窩  
峻正有器量祖諱叙夏曾祖諱思璫並有文行曰處  
亨生員疏請沙溪陞廡曰武進士已亥禮訟為允翁  
祖右曰克有叅奉是七世以上而霜巖諱濬其顯祖  
也妣益城許氏林女生 仁陵癸巳卒今 上丙戌  
墓縣北項亭丑原夫人海州鄭氏考匡忠墓耐右二  
男長載純次載采過房女朴耕浩孫男正鉉餘幼君

性根仁愛在親則常怡愉順志未嘗一遭呵責養之  
必有酒肉昆季四人二弟蚤歿撫孤經家備極心力  
弟婦有疾夜必三四起至門外呼婢調供庶族有孤  
女無依者爲之收養以嫁之篤於奉先輪行墓祀致  
極豐潔丙戌乖厲人遘輒死凡所宜藥戶給同開路  
遇髑髏輒紙裹埋之其實行如此往在頭流之役載  
采以君袒免親雲煥所爲狀屬余豎表之文雲煥信  
友也據而爲之銘曰  
法家擣桀猗古人風天胡不假半途而終有尉丑麓  
卜茲幽宮旣固且寧庇後無窮

三宜南公墓表

此宜春縣馬頭里負巽四尺而封者近故三宜南公  
洛元之墓也其孫台熙以狀請銘於余謹按公字錫  
汝其先宜寧人高麗樞密院直副使君甫爲上祖傳  
至四世有開國功臣領議政在是生景文兵曹議郎  
贈領議政議郎生直提學簡至秋溪處士振學族父  
秋江先生已卯禱作遜于南入嶺之嘉陵晦跡以終  
是十世以上也高祖鵬翼號聳窩有文學曾祖命薰  
祖斗章考必恭外祖處士晉陽河錫夔 純祖已卯  
生少業功令不售有司一以事親奉先爲急務父有

疾臥起不自由公與夫人左右服勤按抑扶持糞除  
洗濯之節必躬親殫誠以至數朔未嘗少懈創建先  
院積誠致懇使遺風餘韻不至泯沒每戒子孫曰忿  
懣不克身必災貪慾不窒家不保又書諸座右曰哀  
正直之被誣罪佞邪之逞姦噫此數事可見其竭力  
追遠善善惡惡之本領梗槩也晚年取醉遊睡三字  
而曰三宜者乃反辭以自謙非其實也享年七十二  
以 當宁庚寅終鄉鄰親戚莫不咨嗟曰善人亡矣  
齊玄風郭氏孀女府使魁后生一男三女男廷瓚蔭  
禁府都事命嗣伯氏蓋為伯氏之繼嗣也女李根洙

李有性郭纘根廷瓚男昌熙台熙台熙今然奉箕熙  
斗熙畢熙女辛泳直權載米權載達外孫男女不盡  
錄銘曰  
是惟三宜南公之藏而有賢媛配焉樹德不食其報  
不爽者天如日不信試看公之子若孫

希齋白公墓表

近故希齋白公隱居蘆浦武夷山下不求聞知以今  
上丁丑二月二十五日考終距其生 仁陵壬申在  
世六十六塋于基洞後甲麓孫觀亭叔錄遺事來謁  
墓文辭不獲則遂撮其槩而叙之公諱師亮字汝玉

系出藍浦文憲公桑齋先生寔其十八世至 本朝  
有曰珍始及武為宣傳官四傳至訓鍊院奉事琬丙  
子虜亂與伯兄奉事珩扈 駕南漢松公六世曰聖  
載曰皆華曰兌極曰尚三寔其四世皆有行誼妣咸  
平李氏父華緒公自幼才敏氣粹孝友根天稍長能  
自強以禮飭躬雖微細不放過安分篤學以沉潛玩  
繹為工或暇日琴棋詩酒未嘗過娛花柳蕩蕩逍  
自適而無詞客玩物態治時文亦精而未嘗以見屈  
介意謙儉慎言動未嘗放過若說名利未嘗懷刺權  
門亦罕入誠場庚子壬寅連遭內外艱哀禮遵制晚

卜居於基洞鄉士請業者眾其為新安院任也焚香  
必齋宿不御酒肉晚究性理書多有自得篤於奉先  
三世先墓在於韓山衰年首掃每有常度而不廢於  
遠祖亦然切於尊周之義雖微細文字必書 崇禎  
絕禁虜號丙寅洋鬧中外涵湧憂歎不已每舉奉事  
公故事教諭子姓宗族人有所請長孫婚事以彼家富  
饒勸之則戒其論財而不聽老益刻勵與後進講學  
不倦村後有壇杏以其講習野人亦戒剪伐此乃公  
懿行感人深者也配金海金氏鍾鳴女生先公三年  
卒後公十月墓各兆一男東郁四女適金仲喜申宅



均安德遠李豐植孫男長即觀亨次益亨履亨觀亨  
男弘均餘不盡錄銘曰

忠信之質復究以學斯友一鄉令人必式

強窩洪君墓表

強窩洪君當以 景陵戊申今 上巳亥生卒於安  
城之栗里壅栗之乾原其胤德厚謁以表阡之文余  
早服君嚮背之正取捨之決而惜其未得遐壽而遠  
就也撮槩叙之君初名坤字範五省齋柳公顏其室  
曰強窩南陽人胄于高麗金吾衛先幸 本朝黜齋  
彥彌忍齋暹兩世居黃閣寔爲顯祖曰樂林曰桔曰

大詰其曾祖祖禰妣慶州李氏振英女君子諒安詳  
早失怙承順慈教從柳心齋始秀及從叔確齋大心  
學始終從二師周旋已已入龍門哭華西李先生遂  
從余重菴及柳省齋委身師事南謁任全齋甲申入  
朝宗巖拜 高皇大統壇勵志飭行夙夜孜孜最謹  
於理氣帥役之分陰陽淑慝之辨遂革世論爛漫歸  
正無一毫依違是雖篤信師說非見之明守之固安  
得脫灑數百年沉痾不擾於衆咻耶事母夫人孝志  
養無違及居憂哀禮備至每日展墓終制不脫衰經  
平居晨謁祠版朔望必叅四時必祭諺譯小學教門

內諸婦人又必齊之以禮和氣藹然自奉則處蔬糲  
怡然不以勢利經心丙子和倭也從諸士友伏闕  
斥和事既不諧杜門自靖服用切禁洋物丁丑後二  
師相繼而歿痛哭如不欲生以白巾伸心喪甲午邪  
學大熾矢死守義彼亦不敢加乙未剃髮令下以為  
寧死不可毀形為歎有滅死無恨之心或有固要以  
出世者嚴辭絕之此君行義之大略也齊玄風郭氏  
父隣三男長德厚次徹厚尚厚女適李敏夏吳鳳根  
餘幼因系之辭曰

猗君執大公離類從正方卓難及其自樹篤學力行  
一始終考于賤之賢有所取

察訪 贈秘書丞申君墓表

君諱鉉九字禹瑞平山申氏其先自高麗壯節公崇  
謙始己卯各臣文節公錦壬辰殉節忠壯公砮為入  
我顯祖自後綏冕相承曾祖曰樟祖曰仁熙父曰聖  
均司果君自幼以孝謹稱及長發越有氣勇今上  
丁卯登謁聖武科家居幹蠱晨昏水菽賓祭酬奉動  
稱情禮二親甚安之戊寅丁外憂過梓哀每哭踊幾  
殊方蘓附身附棺必誠慎無餘憾壬午除尾署別提  
繼為平陵濟源二丞在官奉板輿問寢視膳左右服

勤如古孝子爲郵俗丕變間有以善事親聞者父塋在豐德地墓下居一民謂逼其先塚每積不平一夜率其族黨犯掘未至露棺適一大虎怒吼攪沙石投之而前衆皆懼避匿有報急者君顛倒馳往不問事狀形止之如何只以爲子無狀致此變境痛自刻責一晝夜於墓側哭之痛彼等遂革面請還封其孚柩物而動在人者有如是母夫人壽躋八耄無恙而逝君在衰境執禮一如前喪常云吾年近六旬萬念俱空只隨父母侍于九原乃其願也壬寅正月二十六日即君生朝謂家衆曰年年是日奉母供欣今焉

已矣因泣血終朝服孝服而卒柩廬次距 憲廟戊申得年五十五生辛月日偶與之同亦異矣茲墓于高陽柵峴坐乾之原君自號霞隱今年用士林請贈通政大夫秘書院丞郎舊日承宣之職云配宜寧南氏善洽女二男長顛泳進士議官次德泳過房三女鄭德教全弘奎金正奎孫男東憲東旭顛泳講不明不仁之訓使人丐余爲石面之役噫一片嶽巖千古光輝庸非屠龍大手可宜耶使余代之傷焉已矣顧孝子之懇不容辭也銘曰  
生事塋祭通謂之孝親戚既沒誰爲而孝沒而盡誠

莫如存孝猗君秉心神明可質對彼佳城高陽之麓  
我銘其阡昭示來百

河兼洙墓表

河君智鎬字兼洙居貫皆晉州曩在庚寅訪余青城  
病室又往拜重菴翁於雲潭溪上自後每承問字見  
行墨敷潤屬辭典雅深知為好賢樂善之吉士且聞  
其以明湖權雲煥為舅艾山鄭載圭為師二友是蘆  
沙翁高足子賤之為君子豈無所以而然哉乃以戊  
戌正月干支卒年才六七噫何其短也頃於方丈之  
役路由雲門其叔載翰款余經宿為言君內行甚篤

四歲主宗祀所後父母蚤歿事本生父母及祖母極  
其愛敬不以移天有泛忽祖母雅好書苟得師友札  
必譯而告之或率羣從弟設講會於內堂奉而臨之  
務得歡心事諸父如所生家間吉凶禮節之類襲於  
陋俗者並釐正之每晨謁祠版朔望必然與人交視  
其所以不以門地甲乙大變如恫在已夷狄蹂躪誓  
不共俗此皆情性之正也使天假以年隨才擴克則  
其終也必有進於此者而今已矣吾不忍其泯然將  
具數尺碣使樵牧知其為某人之藏而不得肆焉願  
丈人一言以識之余感舊愴新遂書之如右其父曰

載崑大父尚顯烟艇錫一曾孫雲水堂潤其十五世  
外祖德水李胃信曰載衍曰安東權氏曰最顯本生  
考妣及祖也塋在牛峰先兆壬原娶安東權承夏女  
早卒再娶海州鄭爽教女生三男七女男長海朝餘  
未冠并

三松軒朴公墓表

公諱士華字進權朴氏籍密城父諱安運大父諱文  
賢壽秩同樞曾大父諱慎元糾正諱鉉其上世也外  
祖清州韓龍壽 肅廟乙酉 英祖己丑其生卒塋  
在南平金馬山負辛之原夫人羅氏附左男致世有

文行孫長喜伯次萬伯曾孫佑公 贈戶叅公天稟  
秀異幼與羣兒出遊值大雷雨象皆顛倒獨緩步徐  
行舉止自若長老咸異之及長授小學書自灑掃應  
對以上至事親從兄左右服勤無絲毫勉強意接人  
以恭待物以恕耽玩經史薄於滋味值兩艱附身附  
棺克遵禮制月三展墓終身如一日嘗就僻靜處結  
茅數椽手植三松於庭畔蓋亦託歲寒後凋之義也  
每風清月明朗誦歸去來辭武夷權歌不知世間榮  
辱得喪之爲何事此其高尚清標顧何如也銘曰  
金馬山色碧嵯峨願人典型封四尺賴有賢孫述志

事刻辭所途警樵牧

懼而軒鄭公墓表

懼而處士鄭公諱發民字謙之籍草溪世居嶺之三  
嘉父曰履九本生履猷大父曰光益曾大父曰國華  
八世祖震哲壬辰舉義討賊官至明川府使高麗光  
儒侯倍傑其所自出也母全州崔氏生 正宗甲寅  
卒 當宁己巳享年七十六平生工程惟治易之日  
居三之一焉誦念玩繹到老彌勤而著於文字少不  
槩見蓋易之為學用為貴能言次之是以仲尼之易  
不越乎子臣弟友仕止久速而所願假年卒學者惟

曰無大過而已則公之所養亦略可見矣公稟姿仁  
惻濟以剛果重道義輕財貨眷眷其樂善尊賢念念  
乎惠人利物於一切世味芬華泊然無所好考槃衡  
泌棋酒自娛酬唱諷詠戶屢常滿經史子集皆所暇  
習而以之檢身則言溫氣肅回互機變之巧鄙俚自  
私之累著不得一點美以之接人則好善如不及惡  
惡如已病見寒餓瀆死或顛連無歸者必厚恤款接  
盡其力乃已以之教子孫則於當世賢者推尊蘆沙  
奇先生使之往學焉此又卓越世俗之見而可匹美  
於太中公故事矣噫豈易言哉大既如此餘皆可略

塋在縣東芳洞村巽餘谷坐丙原夫人曹陽河氏益  
範女卒先公三十六年墓某地某坐育五男邦勳邦  
纘邦瑞邦猷邦淇女適驪州李容五孫載圭與不倭  
善日袖公言行以請曰吾先子終身用晦不求人知  
豎表之文不宜夸惟寡於言者可遂忘其固陋序次  
如右後之人庶有以證焉

孺人密陽朴氏墓表

往在辛丑春農山鄭君周兄致其先夫人之狀柩不  
倭曰冕圭不天早失先人之教先夫人撫育成就甚  
艱且勤以迄于茲而塋不及銘無以發其潛懿吾心

惕然不寧敢拜以請余惟文字之淺無以信去人之  
德於後世遲回數歲不容終辭則按孺人姓朴氏籍  
密陽考墓守曰敏佑曰守權祖若曾祖妣慶州李氏  
寡培女孺人自幼以貞靜孝慈稱年甫笄歸鄭公邦  
纘舅懼而公學邃行敦諸子皆業文趾美非令儀淑  
質不易作對孺人一踐其庭順舅姑友婦奴供祭祀  
接賓友纖悉中度無一不可道於人者產一男一女  
男即冕圭六歲而孤孺人常以未亡人自處平居絕  
不見笑語款洽族姻歲時之會未嘗出門外一步家  
貧約炊黍難給而見鄰比戚黨有飢輒惻然動情隨

力購急教子恒詳緩懇惻欲其無忝父祖之緒業勉  
副師友之規戒期學古人之爲者乃其精神所湊而  
可質於神明也冕圭之幼也懼而公嘗謂曰汝幼而  
失父尚幸汝母在吾知其必能教汝貞固清淑之姿  
勤謹孝慈之行吾見無汝母若是則孺人之行他或  
可能而至其為舅婦間知已則又不可多得也生以  
戊寅七月卒於丙戌五月干支葬在三嘉上谷里乾  
原一女適文化柳燦明冕圭四女長適李惠永餘未  
行燦明男道均銘曰  
母之賢足以成其子子之賢足以顯其親大雅之所

山紆水會我其銘之以相後人

石湖李公墓表

公諱祉麟字聖瑞李氏興陽人公生世六十有九年  
足不出里閭名不聞州府而婦孺誦其德士林服其  
行無愧爲十室忠信一鄉善士者蓋的然可信夷攷  
其行治大槩則孝友天樞年十三二親疾劇並裂指  
延須臾命及遭艱過哀毀暑不脫衰病不食肉大父  
及弟或痔或疽皆吮之常言白賁無咎華靡奉身徒  
爲識者恥持身治家一以儉約為主戊子境內有訛  
言料應在歲饑預蓄積以待之東匪初起亟令子姪



親近儒門俾早正趨向公業功令有聲稱及不售退  
讀庸學心經等書殆忘寢食曰恨未於早年致力云  
生以 仁陵己丑卒於今 上丁酉塋在光州北三  
甬之麓西原興陽氏出自高麗衛尉丞正陽升入我  
朝有諱垠司憲府大司憲為 世宗朝名臣有諱廷  
賓受業沙溪金先生即公十五世及七世也高祖應  
元以孝行著曰必坤曰鎮培曰南潤是曾祖禰三世  
妣光山盧氏淳謨女公娶光山金氏考進士師休生  
二男二女男長昌勳早卒次長勳延安金昌秀蔚山  
金基駟其二女壻也長勳踰躄數百里請豎表之文

遂強其昏耄撮而叙之如右銘曰

先質後文聖訓孔哲彼戎夸毗徒備耳目公自得師  
敦本務實在今則無古亦鮮匹我闡厥美昭垂旰刻

烈婦清州韓氏墓表

嗚呼此烈婦孺人韓氏之墓也謹按孺人籍清州父  
章履年二十歸白氏夫曰樂舜字元八以古家子種  
學績文克述先業不幸病卒孺人哭擗幾殊強起裁  
縫治襲歛具附身附棺必誠必慎罔或少忽將設象  
生舅姑謂其過於疚懷命權停及暮將行祥事孺人  
謂值此喪餘禮不容苟且請暫拊几筵以準儀式舅

姑憐而許之乃哭盡哀榾馱禮畢又行朝脯饋奠照  
檢家務一如平日無絲毫幾微見在色辭及夕入寢  
室謂宗黨女子在傍者曰此日此時即我君子捐世  
之刻也其各歸焉遂滅燭就睡已而聞有自盡聲姑  
急往視之已無及矣乃當子丙申二月干支也夫  
哀慟攸激徑情自裁尚不可容易况隱忍苟全不形  
聲色趁其夫死日時而浩然其歸者殆亦難而又難  
决非夫人所能吁亦壯矣及其殯也又有一條光影  
非烟非霧環擁凝結久而不散抑無乃烈婦精靈格  
于神祇發現昭著之不可掩者耶重可異也夫以識

時務位公卿自許以名門世家者能免遺君後親不  
陷於夷狄禽獸者幾希孺人乃以眇然一女子决裂  
授命扶植綱常振勸頹俗天彝民紀賴以不墜所謂  
死輕於鴻毛義重於泰山者實準備語也且天地鬼  
神臨之在上士言世誦傳之在耳此不待太史之傳  
旋褒之典而自可垂百世而無虧矣然則彼一時微  
顯又不足較也白君樂恒蚤年朮志於孺人為夫第  
示以希堂處士尹公錫鳳所述狀丐余置數語不容  
以陋拙辭

慎菴文公墓表

文君鍾覺以其大人言致不佞曰吾先子慎菴公以  
因心之行兼超羣之才喪哀祭敬人無間言學廣聞  
多士風丕變韋布坎壈雖欠一時之遭遇孝友忠信  
實有鄉邦間令聞宜亦秉筆者所可錄而不可緩也  
余作而對曰沃瘠即我先祖孤雲先生杖屨俎豆之  
鄉也維山與水尚可敬止况人於是地德義風流居  
先輩之列者乎按狀公諱昌炫字而明文氏籍南平  
三憂堂諱益漸吏曹正郎諱承泗十六世若九世曰  
基魯曰命龍曰彥周是考祖曾外祖姜啓哲公賦性  
孝謹常以蚤喪二親不克終養為深恨讀詩至蓼莪

篇輒飲泣不成聲謂體魄所託音容如在課日展墓  
不以風雨間之值喪餘散致齊不近酒肉聰明強記  
諾于百家叩之斯應如誦已言行止語默動遵禮法  
士傳民誦屢入鄉薦乃以今 上戊子正月二十日  
卒距生辛未壽七十八臨命作五七絕各一首氣象  
安閒無但化意其定力有如此者塋大鳳山中降癸  
麓娶慶州金氏夏龜女孝舅姑敬君子有女士稱墓  
各兆男長東瓌監察陞通政次相奎二女適杜洪奎  
田溶祥東瓌男郎鍾覺次鍾舉出系相奎后二女適  
鄭鍾燮申彥直鍾覺鍾舉並文行克家三賢壇及紫

泉臺之役與有勞績淵源所自不可誣也銘曰  
公惟名聞望南服美質俊才絕倫匹以茲需世無不  
達胡然蘊櫝老蓬草視履考祥叶元吉我銘墓石不  
愧筆

僉中樞鄭公墓表

僉知中樞府事鄭公世咸字來瑞其先草溪人中世  
有西亭玉潤始居三嘉是生來彥號漁隱淵源于趙  
漁溪旅麗澤於金畢齋宗直九世若八世高祖夢駟  
司果曾祖弘績祖頴卿考姬章外祖全義季樵生  
肅廟甲戌卒 英宗乙未墓在縣東長田甲原公性

嗜書家窶艱紙筆每畫字沙上或代以柿葉慮事審  
慎決於幾微擇友端正不輕唯諾時賊亮居安陰有  
重名士友多遊從公亦一至其家纔數語輒不辭而  
去人問其故曰是子將償家矣戒子弟慎勿濡跡戊  
申事發衆服其先見噫知人之難聖人以為病而吾  
夫子亦有聽言觀行之戒則此雖一事亦可以槩公  
矣淑夫人林氏籍恩津考世亨金氏籍彥陽考彥鳴  
三男二女長道元出為伯父世龜後次道參道俊女  
成應器尹慎孫男師極師洛女崔克欽道參出師一  
道俊出曾玄不盡錄玄孫煥民文行克家使兄孫昌

聖問刻柩余不容以病廢辭因序次如右

全孝子墓表

庇仁金棘人龜年袖其先大人孝子翁狀來請暨表  
之文謹按翁諱霽字永文系出金海考昊太祖振道  
有孝行丙子之禍與六臣齊名而官冢宰諡忠毅曰  
文起者其十四世遠祖 仁陵丁丑今 上癸卯郡  
西月湖之麓負甲而封者此其生卒墓域也礪山宋  
氏持奎女慶州崔氏漢喜女男長鶴年次龜年象年  
孫寅德寅行寅昶寅完寅咨寅亮此其配位子姓也  
少丁父憂毀幾滅性為其母在堂疚懷不敢任情過

哀而無從之淚失聲之哭有時自發於閒居夢寐間  
毋夙有令聞至是欲決意下從翁輒晨宵侍側多方  
寬譬承之以怡色柔聲遂至感悟乃已居致敬養致  
樂志物之兼不換三釜或因事出外未及反面而親  
有不安則忽心驚肉顫不能自定如黔婁之為者毋  
於病中思異味不時之瓜難致之鵝有感斯應依然  
若造物準擬及革嘗糞斫指不止一再與三弟二妹  
同室而居分甘析少好惡與共庭無間言數十年如  
一日此其孝友梗槩而大既如此餘皆可略噫惟天  
生民均賦以仁愛之性而稟質所拘風氣所牽其能

保赤子之心而不失為善人吉士者蓋亦鮮焉則希  
堂子所云身勤耒鋤仰事父母力辨經史下教子孫  
者可謂言近指遠擷撲不破而垂諸無窮又安用贅  
說為哉

鄭仲儒墓表

鄭君仲儒諱鉉彌草溪人以 憲宗癸卯今 上丁  
亥生卒于三嘉墨洞塋在所居村後子原君自幼意  
度溪遠賦性孝以早喪二親茹至痛事繼母盡誠晝  
居必侍側夜臥必向內以候起居嘗侍病久心憂不  
椰翹終至頭髮盡落事孝父如事父異室同財一衣

一味必先已奉進常恨失學每思以穀其子必盡其  
力與人交信每事約束沉思乃應已應必不易至於  
應物制事審機敏速若自定美中出來人不見其有  
事歿前一日會家人訣囑其婦奉母之道甚切指其  
子令託其總叔艾山載圭教導割田獻其季父以供  
奉養招其再從弟亦割田給之至於所嘗任使者亦  
分田賞處置後事甚詳婦及二女血指滴口戒止之  
曰死生有命吾今逝矣少無怙意恬然而化此可見  
天姿之清而天何豐賦畜施若是相違也君家以高  
麗光儒侯倍傑為上祖歷都承旨師仲西亭王潤至

臨淵亭宗仁懲忠黨議杜門尤志於君七世曰履範  
曰始敏曰邦泰曰錫圭即其禰祖以上妣安東權氏  
星山全氏配延日鄭氏府使東基女晉州河氏在源  
女三男元永峻永普永女適成載漢南昌熙許淹內  
外孫蕃衍此其發施於後者耶元永以君總叔冕圭  
所述謀及於余哀其孝懇遂畧叙如右

曹穉周墓表

洪原曹君東煥穉周甫居今墓古遠遊從師於吾友  
柳省齋門如余空踈亦不惜遠訪將大有進就相期  
特浚遽以令 上甲辰正月十六日歿逝從子喜駿

書來要余撮其事以示久遠感念存沒不忍牢辭  
氏自新羅駙馬昌城君繼龍始 國朝靜齋尚治當  
光廟受禫守義自靖是其顯祖曰命會曰錫斗曰孟  
承曰秉轍是其高曾祖考妣濟州高氏德盛女君以  
哲宗乙卯生于都龍里莊重淵深事親孝侍疾二十  
年未嘗一日少懈居憂盡哀喪餘如袒括奉先齋素  
致誠出入必告廟課業最從大小學玩索甲申秋東  
脩謁省齋省齋嘉其志以三書衍義五倫說等篇諄  
諄勸勗癸巳省齋喪加麻行心喪四禮疑喪之節躬  
行及人就質信從者衆日必冠帶危坐抄錄聖賢格

言以備警省朔望及令節與士友行鄉飲酒相揖禮如儀講討不倦已亥任鄉庠修鄉約時有染耶菴學者君心憂善誘令焚邪書乃已庚子倡士友設經學契及卒鄉士痛甚塋于白鷺山先塋乾麓娶丹陽李氏詰冕女墓各原全州李氏景允女男喜胤前配出早幼孫男圭勳噫秀而不實聖人所歎傷豈意於知舊親見於遂就其狀藥括如右俾題于表石使過者知其為葆陽居士之藏而式焉

醉菴宋公墓表

公諱之安字伯仁宋氏其先自麗末延安府院君肅

毅公卿始歷吏議判書勳中即將雲龍政堂文學復隆門下省事根入我朝禮曹判書有良大司諫嗣殷應教希騫最著自是蔭武相承仁祖甲子有曰純錄振武原從勳是七世以上曾祖秀運祖天健考亨命外祖清風金錫鴻公以純祖乙丑生天賦秀異自幼有孝名雖菜果之微不先入口視飯點突不替餘人母病冷症積歲彌留禱於山掘一異卉而歸問諸識藥者蔘也所患得差甚過哀毀祭致洗腆自奉簡朴晚年貴稍饒即推而急人在鄰里族黨尤致恩義儲經史教子孫樂善好義如恐不及雖在倉卒



聲色不遂正家以禮御下以寬此其狀辭大略也享  
年七十而卒於今 上甲戌十二月壬支葬在延安  
府永達面三屯村先塋坐甲之原配宜寧南氏亨詰  
女繼配全州李氏致膺文墓並各附男永祖蔭監役  
女劉宗晨南氏出恒祖女黃長夏李氏出水祖男洛  
善洛九並登庠女朴慶我權仁植恒祖男洛會曾孫  
男達植春植並生貢冕植廷植彥植憲植遠植範植  
俊植文植內外孫多不盡錄進士君跋涉數百里踵  
門諗於不佞曰吾祖醉菴公生老蓬草雖無著顯惟  
茲行義宗族稱之鄉黨誦之載在邑誌者昭然可據

則亦立言君子之所宜書也願借一言以揭墓道余  
感其誠而諾其言遂忘拙叙次如右

雲林齋崔公墓表

惟延安府紫鳳山下讀書洞負壬四尺而封者故雲  
林處士崔公諱壽山之藏也謹按公字仁卿海州人  
麗朝文憲公諱冲設九齋教授後進功在斯文世稱  
海東孔子由是而子孫曾玄至十餘世紱冕蟬赫炳  
載史乘入我 朝有弘文校理璘懲燕山戊午禍退  
休迺安別墅因居焉是七世以上曰宗祿官副司勇  
曰克光從仕即曰擎星通德即曾祖祖禰妣仁同俞

氏陽女以顯廟甲辰生慧悟絕倫六歲授白首文  
聞輒成誦既長就塾經史子集次第卒業而於中庸  
用工最深讀至萬餘遍孝奉二親曲盡子職自幼至  
老孺子慕如一日前後喪並廬墓哀毀骨立幾至滅  
性有反風滅火之感及闕構雲林精舍謝絕芬華一  
以講學為事每晨誦敬齋夙興夜寐兩箴及濂洛風  
雅我東先正贊銘諸篇庭除多植松竹峨冠博帶時  
攜短筇徜徉吟哦不知世間得喪榮辱之為何事又  
等平延臺排八景品題以叙幽懷時人望之不啻若  
神仙中人鄉隣學者多信從受業彬彬有蘓湖之風

地主林葵為書鶴棲翁三字以致欽艷之意居家嚴  
內外之防律身厲節儉之操生計甚疎炊烟屢空而  
無皺眉之態奉先以誠接人以敬值國忌必齋戒  
正衣冠達宵平生足迹不及偃室而口不道官長得  
失繡啓道剡前後聯翩而視之若浼至在邪正淑慝  
之分便一刀兩段持論不苟嘗云言行相左幽顯相  
殊則是欺吾心餘無足觀即此數者而觀之則可謂  
待價之蘊玉躬行之君子而非才有一能寸長汲汲  
求賁者所可彷彿其間奧也享年六十二而卒於  
英祖乙巳配清風金氏自明女墓合祔繼配江陵金

氏秘女各窈一男時遇孫男昌國昌朝昌晦昌裕後  
孫明根以門父兄命來請暨表之文余病廢筆硯不  
堪為人金石文字而闡先常情不容昧然遂忘其猥  
而叙次如右銘曰

有倬文憲昏衢炳燭繼世儒宗傳家相業源遠流長  
寔循舊德公襲前光欽華就實言行相顧古訓是式  
在家在邦何往不達我作銘辭昭垂千億

密直司事郭公墓表

此清州府北大栗里負子之麓即高麗名臣密直司  
事清州郭公諱預萬年宅也按公初諱正府字先甲

公家以喬木稱文成公元順顯公尚文忠公坦最著  
祖諱琦侍中謚文簡考諱埒四門博士新羅侍中諱  
祥其遠祖也生於高宗壬辰以文章筆法闡于世早  
登魁科爭高宗元宗及忠烈王三朝居帷幄有補衮  
佐理之功掌遴選有得人畫材之效奉使命有畏服  
鄰國之信盡忠王家事載史策而詩播於箕雅書著  
於筆苑其詳不須煩也忠烈丙戌如元返輶卒于路  
享年五十五還葬于楸洞楸洞即今之大栗也世遠  
失傳 憲廟戊申掘得誌石于階傍有姓諱不泐坐  
面與家譜符合因封等豎碑今諸裔散處四方無慮

手數而名德簪纓為世望族源溪流長本固未茂儘  
不可誣也前夫人竹山村氏參知政事映女後夫人  
南陽洪氏良醞署令仁胤女碑未遑記其陰後孫漢  
紹請余識之顧從遊問學相信者久不忍以老病辭  
略叙如右

慕窩李公墓表

公諱憲秀字汝寬李氏系宗姓父諱東彥祖諱昌協  
曾祖諱丞高祖諱泰煥文博士評事貞簡公諱穆為  
九世顯祖外祖昌寧成就章生 仁陵壬戌卒今  
上丁丑葬在任實高德山南杜牧洞負坤之原公賦

性懇惻事親極愛敬家素饗教授為養可口之味便  
體之物靡不畢給篤於友于服食器用無異同值外  
艱廬于墓側晨昏省哭面深墨未嘗見齒三年如一  
日里人感服隆冬虐雪每致以升米束薪而助給焉  
奉先以誠祭田祭器凡百需用必先宗家而及我私  
間拜錦谷宋先生先生亟稱以暮年好學罕見如君  
雅好山水所居三峰雲林窈窕溪石鮮潔時或命賓  
友杖屨觴詠以宣壹鬱遇忠臣義士遺蹟去處輒發  
為詩歌牢騷慷慨令人增感又與鄉中年高作十老  
會往來酬唱翛然有物外之趣至其謂士不得立朝

事君展布珥蘊只當修身俟命又謂安莫安於無逸  
吉莫吉於寡慾非分莫取非義勿取云者語屬尋常  
亦喫緊自道之辭惜乎世鮮知德刺史不能薦天子  
不聞聲而坎壈以終也夫人羅州羅氏命欽女有女  
士風四男顯德顯龍顯琪顯昇皆恪謹克家鶴善鳳  
善李河九蕪述永妻長房出二房無嗣取族子繼善  
為后長善金洪基妻三房出萬善四房出曾孫錫庸  
來請銘銘曰  
實言實行養我心田十室忠信公寔其人

忍齋姜公墓表

忍齋姜公諱亨殷字子胤以 景宗癸卯 正廟丁  
巳生卒於晉州歲花枝貢里竹坊山壬原六代孫栢  
淳以門父兄命謁樹徑之文余於南為邂逅嘗略耳  
其世德矣不容牢辭公晉州人以高麗太子太傅殷  
烈公民瞻為遠祖歷至 本朝簪纓相承高祖諱選  
壬辰倡義曾祖諱以渭號養拙居士祖諱東悅壽秩  
護軍考曰舜俞外祖昌寧曹漢昌配星山李氏胤甲  
女二男皆一賢一二女適河鎮奎河鎮豈孫曾繁不  
盡記公齟齬已知孝親敬長讀書值父祖嫌名處必  
止聲默識親若出外及歸期必俟待路次雖經宿不

敢徑旋嗜酒嘗醉貽親憂終身絕飲恨蚤孤不及致  
養事慈闈如嚴府志物兼備家幹必粟而行無敢自  
專嘗侍疾夜自煎劑滿載飛霜母夫人歎曰我疾將  
瘳數日果然丁喪廬墓行素風雨必號泣墓前及至  
返室鬢髮盡白俗節上塚必痛哭奉祀致嚴雖瘳疾  
必躬親將事事伯氏盡友誨宗姪盡誠敦宗族忍鄉  
黨置義庄收其入別藏飢饉喪葬資以救濟嘗歲值  
蟲災公田獨不犯人咸異之坊民豎碑頌德又置書  
社迎鄉里之志學無資者分給紙墨典籍以勸課之  
少以親命赴舉夜夢母夫人倚門呼歸驚慮促還則

親疾已革因以棄世自後更不赴平生誦念在心經  
近思以忍扁齋吟詩寓意曰勉膺一忍字保得太和  
真常戒子孫曰孝友為本領忠恕做基址治心敬義  
為要治家勤儉為務此其大略慨習俗之日渝歎賢  
行之難聞表出被石警示後人

隱溪姜公墓表

公諱台俊字孝由隱溪其號居貫俱晉州姜氏著自  
麗朝 國朝有諱安重文科忠清都事以直諫被刑  
曾王考亨殷號忍齋王考旨一考曰時伯妣晉陽鄭  
氏考志翰配青松沈氏續漢女男聖緒生貞聖喜文

科正言孫男俸鎬參奉常鎬皖鎬女具述祖進士生  
員出泳鎬麒鎬冕鎬璨鎬履鎬洙鎬文崔箕炫趙大  
奎正言出曾孫若干公以 仁陵丁卯令 上丙子  
正月朔日生卒葬在鼎材里鼎洞未原幼不樂嬉戲  
十歲先公被人誣訴莫能伸公入府條陳事理明正  
府司嗟歎握手曰有子如是而寧行不義被誣可知  
事因得伸弱冠文藝精敏事親極承順侍湯不解帶  
居憂感暑不脫衰藥藥三年如一日教育諸弟析箸  
必均取其荒頓或有過差諄諄泣諭教子盡誠八九  
歲迎置經製兩師而教之及二子連登大小科人皆

榮艷而益惕然勉戎以筋勵之方追遠盡誠管暨先  
碣初設宗契賙貧族窮交皆不惜百金重義輕財有  
如此者矣晚構一舍於溪東扁以隱溪嘯詠自樂誠  
子孫曰治身之要誠正為根抵敬義做門戶此公積  
蔭成家之梗槩而善積必報可為後來者勸也會孫  
栢淳請堅表之文蓋以余嘗南為畧有耳聞而及故  
也不容病辭略叙如右

副護軍鄭公墓表

副護軍延日鄭公以遐陬書生又不得年宜其草木  
同腐而迄今餘芬未沫有可稱述者謹按其家牒公

才踰弱冠當壬辰之變聞 王子臨海君入北告其  
父曰方今 大駕蒙塵社稷為墟為臣民者義當勤  
王而大人老無奈何不肖當糾合義旅以承父志矣  
既而 王子為會寧賊鞠敬仁等所執公又丁內憂  
事遂解矣雖在兵荒中送終塋祥哀禮備摯服闋特  
除禦侮將軍龍驤衛副護軍公曰我無寸勞徒忝名  
器大壞廉防終不起筭室于湖上漁樵以養親經史  
為茶飯於世務利達若將浼焉噫以公之才之行天  
假之以年則其所樹立優為北方之標準局於氣數  
如斯而止可勝惜哉公諱萬亨字大敷圃隱文忠先

生寔其九世顯祖也高祖諱賢輔師醉琴軒朴公出  
監長城縣 光廟受禪遂棄官歸辭連六臣獄謫文  
川自號訥巖仍家于文文之有延日氏始此曾祖諱  
叔孫中直大夫曰自華曰世洽祖若考也妣礪山宋  
氏公以 隆慶丁卯生 萬曆丙申卒壽厘三十墓  
本郡明湖社項洞良麓配宜人漢陽趙漢麟女後公  
十八年卒墓祔公有一男一女男義生參奉朴應立  
婿也義生生五男長汝寬參奉汝補汝規參奉汝禧  
汝宣也墓舊有碣今苔蝕字膚不可讀其冢孫元植  
將伐新石走其族人乃和敏和朮珩刻在余余以病



廢殘縷何敢泚筆於人之金石但難辜千里勤意繫  
叙世系生平庸表四尺之封

贈司憲府監察文公墓表

人倫日用孝悌為本家國天下誠身居先夫人而知  
講明誦習然究其終也背馳弁髦買櫝而還珠者十  
居八九吾於是知故 贈監察文公之賢也其言曰  
人而無本於修身何家之不齊如正人何又云人性  
本善豈有異同特以所養之善不善而禍福各以類  
應故君子之學惟事之當為者為之而已不問命數  
之如何噫此數語者雖質諸古人而無疑矣夷攷其

見於行為則侍在親側色愉氣和務悅其志山漁水  
樵居寧善養或有疾輒謁醫問劑晝宵靡遑嗟過乎  
哀祭致乎嚴墓在一舍地每日展省不以風雨間之  
事叔父如所生每事必稟命友二弟有同被之愛嗜  
義若芻豢惡惡如鳩毒鄙俚之聲竒玩之物不接於  
耳目怠慢之容邪僻之氣不設於身體月朔則引諸  
子諸弟講所行得失而勸獎懲戒務歸於正對鄉里  
後生眷眷言莫重者生我之親難得者連氣之屬愛  
日之誠友子之篤豈可一刻放過是其行治大略不  
失為小學中人亦有得於正心誠意之說也歟公諱

永奎字周明籍南平三憂堂益漸寔為顯祖曰達彥  
曰起尚曰致赫父祖曾三世年四十九而卒於今  
上巳巳葬在沃溝縣之七星峰下耳脉洞良原配淑  
人開城金氏考應星淑人晉州姜氏考日英四男長  
錫龜次錫龍錫麟錫鳳孫男秉澈慶澈女蔡奎夏長  
房出允澈二房出思澈南澈珍澈三房出宗澈壽澈  
亨澈四房出思澈將其世父命丐余為豎阡之文遂  
按狀撮而叙之如右

副護軍崔公墓表

公諱弘豈字洪甫月城人國初清白吏成均館司成

諱泐七世孫世有冠冕為著族曾祖諱三宅 順陵  
叅奉 贈漢城府右尹祖諱秉天成均進士考諱成  
元隱德不仕始移大丘遊鄭寒岡門壬辰亂倡義旅  
殉節東萊追 贈兵曹正郎正即夫人慶州李氏肇  
祖之女以 萬曆癸酉生公公早習弓馬登武第官  
至通政副護軍 仁祖五年丁卯公上疏極言邪正  
之辨及賊起相臣吳允謙以為向者聽其也之言必  
無今日之變公性恢廓脫流俗晚歸鄉里不以家務  
屑意敬以承祭義以教子與李南村允元為心交勸  
進後生多所成就每聞國家有事憂喜必同或以朝

衣北向拜禮而祝之雖尋常嘯詠每有不忘君國之意其心炯炯若可見矣以崇禎乙亥九月十五日卒享年六十三葬于漆谷西北面土橋洞子原配淑夫人月城李氏縣監啓立女墓大丘鮮北村廣里生二男長湖龍歿无后次值龍早登痒以文學薦除叅奉不就孫得達生員曾玄以下不盡記九世孫鉉述與之相見於月城佳巖之宗堂請有一言以表墓辭未獲考其家乘略叙如右

通德郎許公墓表

嗚呼此晉州龍奉里東旨洞坐巽而封者故通德郎

許公諱湍字致瑞之墓也按狀言公稟資魁偉尚氣義重儒學好賢樂善平居沉重簡默不言州縣得失人物長短事親以孝奉先以禮輕財好施予凡貧乏不能娶壻嫁娶者無論親疎並有所賴以至新陳文際水旱災年窮交切姻待以舉火者百餘家噫公之事行此其大略可書也已許氏貫金海以三重大臣駕洛君諱瑛為始祖麗末冠軒先生諱邕有文章德行以典理判書隱於丹城之丹溪與牧隱李文靖公相友善諱少皂恭愍朝官掌令以剛直名於世有孝行旌閭觀瀾諱國柱壬辰之役舉義有勳贈兵曹

叅判蓮塘諱東豈官副摠管時允齋宋文正先生承  
寧陵密勿之教擇文武備具者若干人別單 啓稟  
而名列其中於公五世以上曰晚曰綸曰綬曰鑑是  
其四世生以 英宗庚午卒於 純祖己巳享年六  
十配恭人碧珍李氏考挺嶺星山李氏考瀟男柝榦  
楠俱通德卽女權正謨河吉範碧珍出也鄭希賢尹  
永權星山出也柝無嗣取榦子丞爲后女適鄭竣權  
秉天河鼎明榦男長丞過房次燮女適鄭昌基金燾  
崔齋鎮楠男燧膚煇瞻曾玄不盡錄玄孫萬濟不佞  
晚友也跋涉嶺湖謁文甚勤未可以老病爲辭而終

於無作也遂撰次如右後之人尚有以攷焉

梅竹軒李公墓表

三嘉之雲谷洞負亥而封者故處士梅竹軒李公巖  
公林壑七十年杜門劬書不聞達有時吟哦以寓  
風泉之感詩曰泌之洋洋可以樂飢又曰心之憂矣  
我歌且謠其公之謂歟公諱桂字擎字其先以駕洛  
之許唐天子賜姓李仕麗朝封邵城伯邵城今仁川  
子孫仍貫焉奕世冠冕傳至永嘉齋楹官典醫監正  
以格天之孝碑沒字旋間是其九世祖也高祖元禎  
曾祖札祖賢炳考春可並有行義妣竹山朴氏思謙

女公性度沉重器局深厚及長好讀書善屬文出遊  
庠塾儕類莫能屈嘗以早孤不及躬養為至恫事母  
夫人極其誠敬病致憂喪致哀無愆古孝子為者人  
皆稱水慕公有孫自南漢丙子以後謝絕公車用工  
最專於庸學及心經近思錄有所得筆之於書其未  
得必潛思默繹洞然乃已所與道義密勿麗澤相資  
而始終不替者如鄭桐溪李蘆坡朴无閤堂諸公皆  
一時賢流也晚居雲谷谷有泉石之勝蓋寓慕考亭  
素誠即然亦以坊名之偶同也蒔梅種竹因以為號  
俯仰其間樂以忘憂嘗有詩云中原非復 皇明國

別界寧為武陵仙又謂與其有取於人曷若無欲於  
已與其使人可賤不若以賤自安噫古人不可見而  
其心若可見若公其所謂篤行好古之君子者非耶  
卒於丁未二月二十三日距其生 萬曆庚寅享年  
七十八配鐵城李氏結女有閨範五男長祖仁察訪  
次先仁宅仁由仁通政昌仁禮賓寺別座四女朴繪  
崔明立成洛泳李保新察訪男景尹景說景亮察訪  
由仁男景尚昌仁男景泌景遠景翰公歿二百餘年  
墓無刻後孫仁錫求錫等懼無以別於樵牧也將立  
石以表之謀及柩余不敢辭遂按狀叙次如右

拙菴崔公墓表

余有遠方之宗曰允樞字敬和號拙菴世居嶺之河東以孝謹聞如事二親怡愉洞屬夙夜靡懈處兄弟恒懋樂未嘗見拂言戾色喪三年日展墓雖風雨不廢家用百須經紀縝密盛水不漏至合用處輒傾倒無吝意接人也恭及物也惠訓子弟眷眷以孝悌忠信為急先之務多少懿行不愧為小學中人而無刺史之薦優游自適以當寧己巳平距其生 正宗丙辰享年七十四今昆陽郡西部面舞鼓洞亥麓郎其藏崔氏籍慶州父同樞國臣大父尚傑嘉善曾大

父瑞龜通政壬辰宣武功臣仁寬其八世而新羅侍郎文昌侯孤雲先生為始祖外祖判官清州李春芳齊全州李氏考載白晉陽姜氏考福同三男五女男相淳曹國振妻李出栢淳杞淳黃載挺曹秉殷鄭基昌許觀德妻姜出嗣孫柄善克家趾美講不明不仁之戒將成南坡桑永所述狀屬以豎表之文遂略加點竄如右銘曰

象皆熙穰心勞日拙任分自在誰爭我拙睠彼四穴善人攸藏呵禁樵牧無或夷傷

贈教官觀瀾鄭公墓表

嗚呼世降俗渝文勝質甚久矣苟不誠於中雖割股  
廬墓乃為人也今於觀瀾鄭公實蹟竊有感焉公嘗  
以親命赴試入京忽心驚至家則父病已七日非至  
誠感格視柩無形者惡能爾也早襲詩禮精於文藝  
所著文字巾衍不貧而皆搜括付火曰留此恐為子  
孫累噫公真古之人歟公諱達賢字孔若系出海州  
以高麗侍中肅為始祖 本朝有易 贈領議政謚  
貞度至希儉進士虛菴希良弟也四傳而文孚號農  
圃壬辰倡義討倭光海朝坐詩案被禍後 贈左贊  
成謚忠毅忠毅二子長大榮進士 贈執義次大隆

贈承旨愍忠毅公禔兄弟遂遜于南晉之有鄭始此  
承旨有孫構號露頂軒是生相點號不憂軒文學名  
世於公會祖祖塋考鏡毅妣安東權氏主簿必時女  
銘毅某郡某氏其本生也 正廟戊戌生 憲廟己  
酉卒壽七十二配青松沈氏能復女無男取從祖兄  
之子匡龍為嗣一女適安東權應夏孫男柱教曾孫  
男宗錫庶漢錫宗錫男長泰奎次奉寔出為忠毅公  
嗣孫餘幼公於孝謹天性也婉愉洞屬志體之養莫  
不畢舉日夕侍側雖祁寒暑雨不去冠帶及遭艱葬  
祭一遵古禮鄉黨莫不感歎人或稱以孝子則輒赧

然有愧色是其惻怛本情豈可與聲音笑貌者同日  
語哉銘曰

為人為己誠偽之分舍彼取此鮮乎有聞篤學純孝  
惟公則然我撮其大揭彼佳阡

處隱吳公墓表

昔在丙子忠臣義士之為 皇朝效忠殉節者前後  
相望皆昭垂褒典光載國乘 朝家顯忠樹風之道  
衣斯至矣其或身在草野名不登於朝籍而倡募義  
旅隼手捍禦能效摧陣陷敵之功其向上衛國之忠  
亦豈非卓異昭著而以地之僻遠事蹟之沒而不顯

者間多其人以余所聞處隱吳公即其一也公海西  
人也當虜兵之入也一境波動如鳥駭斂竄公慷慨  
雪涕糾集徒眾毅然有捨生殉國之心道伯聞而  
壯之摧以為義兵將公益自奮勵以死誓衆激以忠  
義士之聞風者莫不響應公身冒矢石手犯鋒刃赴  
虜陣如入無人之境最其長壽山下一戰之功尤有  
大焉其首虜為二十餘級其奪牛馬而還其主者為  
數十頭其道內人之被虜而得復還者為五十餘人  
報聞於營道伯李培元將具狀褒聞于朝會以其家  
眷之避兵江都欲棄官而往公慨然曰國家安危在



此一舉安有後君父而顧妻子者乎辭氣俱厲培元不聽而公之精忠偉勳竟未及達于天陛其後公獨以孤軍固守長壽山城以禦虜兵及聞江都不守旋有講和之舉東向痛哭遂罷兵入山中隱不復出獨書崇禎年號以寓尊周之義及老還白川舊廬以疾終享年六十七塋于佛堂湖乾坐之麓從先兆也公諱汝相挺甫其字也系出高敞其先有諱學麟仕高麗為翰林學士有諱世文東閣學士號漢陽以文章顯入本朝有諱六和禮儀判書其後簪纓相襲高祖諱景福奉事曾祖諱雲鶴司直祖諱守範司

直考諱淑通德即妣驪興閔氏奮順副尉世俊女慶州崔氏參奉洛女公即崔出以萬曆乙巳生天姿貞固俊邁風儀莊重端雅聲音雄亮至聞五里膽氣過人雖疾風雷雨少無動容持身謙謹非法不道德量寬厚未嘗言人過稟性慈仁澹於財利雖絲毫之微非義不取凡於服食之節一以儉約為法其於內行尤篤至事親盡孝鷄鳴輒盥櫛侍坐終日無歌側怠慢之容親癢衣不解帶藥必嘗而後進嘗謂事親者不可不知醫遂留心岐扁極臻其妙有一兄一弟盡其友愛接人必謀忠恤窮必盡心足跡未嘗及於

貴顯之門言論未嘗及於臧否之間鄉黨親戚莫不以君子稱焉公稟於性者既卓犖存於中者又篤厚故值國家搶攘之時以第鄉之一韋布身自倡義以死為期雖其軍孤卒弱不克大有成績而蔽遮海隅沮遏莫強之虜鋒其樹立之卓亦足以有辭於後况其潔身自靖隱潛窮山獨保 大明之日月而不復北向坐其義詎不偉歟配海州吳氏恭奉賢後之女靜一柔嘉有女士風後公一年歿耐塋舉三男二女男瑞霽瑞靈瑞霧文適辛楫全慶昌瑞霽二男命達命道瑞靈一男命昌瑞霧二男命載命世辛氏婦二

男彌昂彌亨全氏婦三男德光德亨德誠曾玄以下不盡錄後孫龍圭善一善德以公墓無刻也既具石徵銘於不佞不佞方以時虞滯留京邸何暇為筆硯之役但公節義始終竟有不可泯者故叙之如右而繼以銘銘曰

公奮布韋所仗者忠一馳羽檄應響如風大殲醜虜偉烈洪功遜于窮山庸保晚節幽宅何封冠山桀桀刻詞貞石我筆欲裂

勉菴先生文集卷之三十四

